

KOMEKA KOSALELA
NZAMBE MOSALA LIBANDA
YA MOKANO NA NZAMBE



Totikala mwa moke ndenge totelemi wana tozali kobondela. Togumba motó.

Nkolo, tozali na esengo na ntongo oyo koya lisusu na ndako na Nzambe, mpo na liyangani mosusu. Pe tobondeli, ee Nzambe, ete Ósembola biso na ntongo oyo na mabunga na biso nyonso. Lakisa biso banzela oyo Obongisi mpo na biso ete tótambola. Pe pesa biso ngolu pe bolingo na Yo, mpo tokoka kolanda banzela pe malako yango na motema mobimba, na ntina ete, tokoka komonana, na mokolo wana, kati na Klisto, kozanga ekweli, mpamba te tondimi, Nkolo, ete komonana na Ye ebelemi.

² Tomoni bilembo nyonso oyo Alobaki ete ekosalema liboso mpenza na Boyei na Ye, kokokisama sikawa. Pe na esengo, tozali kozela ntango yango. Ndenge Abalayama ya kala azalaki kozela mwana na elaka, ntango amonaki bilembo ya suka ya Nzambe kokita na mokili, na ntango wana nde ayebacki ete etikalaki lisusu ntango molai te ete mwana yango aya. Pe sikawa tozali komona yango kosalema lisusu. Yesu alobaki na biso ete: “Wana ekobanda makambo oyo kosalema,” totombola mitó na biso, mpo ete lisiko na bi—bisó ebelemi, “nsomo ya ntango, mikakatano kati na bikólo, koningana ya mabelé na bisika ndenge na ndenge, konguluma ya mbu, mitema na bato kosenzua na nsomo.”

³ Tososoli ete tokómi na ntango yango, oyo bikólo bazali koyeba te eloko nini basengeli kosala. Etumba mosusu ezali koya, ezali komonana bongo. Ekozala mpenza likambo moko ya nsomo! Mabelé ezali kopasuka, bato ya zebi bazali koloba ete likambo moko ya nsomo ekómi pene. Tomoni Biblia kolobela makambo yango. Boye, Nkolo, sunga biso lelo ete toyika mpiko na kati na ndako oyo ya kosembolama, pe toyamba mitindo ya Nzambe na biso, mpo tokende liboso kati na eleko oyo ya molili, mpo tongengisa Pole, mpamba te ekoki kozala libaku na biso ya suka mpo na kosala yango. Mpamba te tosengi yango na Nkombo na Yesu pe mpo na Ye. Amen.

Bofanda.

⁴ Namoni ete oyo ezali litomba monene, ya kozala awa kati na losambo oyo na ntongo ya lelo. Bolimbisa ndenge tozangi bisika ya kofanda, awa, mpo na bino. Esika oyo etondi meke, pe bato batelemi libanda bisika nyonso.

Bino baoyo bozali libanda sikawa, bokoki koyoka liteya oyo na ba-radió na bino. Nabosani. . . [Moto moko alobi: “Ntuku mitano na mitano kino ntuku mitano na nsambo.”—N.D.E.] Ntuku mitano na mitano kino ntuku mitano na nsambo. Bino baoyo bozali libanda, na bisika ya mituka, pe na babalabala, bokoki koyoka liteya oyo na ba-radió na bino, kati na ntuku mitano na mitano pe ntuku mitano na nsambo na ba-radió na bino. Na bongo tomekaki. . .

⁵ Nalingaki kútu kozonga awa, mpo na komeka kosala mikolo zomi ya mayangani, mpo na koloba likolo na *Nkeni Nsambo Ya Suka*. Mpamba te, katikati na Nkeni yango, Bakelelo ezali wana. Pe nayebisaki bino kati na. . . ntango nalingaki koteya likolo na Bakelelo Nsambo, ete nalingaki kotalisa yango elongo na Nkeni pe Malozi. Pe nakanisaki ete ekozala ntango malamumu. Nauti kozonga na mobembo nasalaki na Afrika, pe—pe bana bazuaki naino lói na bango te.

Mwana na ngai ya mobali ya moke, Joseph, asalaki—asalaki mwa. . . asengelaki, na kati na mwa bapóso, koyekola kotanga. Alongaki, malamumu, kasi akómaki na katikati ya bilembo oyo esengelaki te. Boye tomonaki ete átikala na Tucson, boye, wana ngai nazalaki na Afrika, ye akobaki kotanga, na kelasi, mpo na kobakisa mayele.

Na nsima tozongaki awa. Pe nakanisaki ete, wana bana bazalaki na lói, nakokaki kosala mwa mayangani awa elongo na bato, pe nateya mateya yango. Kasi ntango tokómaki awa, tomonaki ete tokokaki kozua ndako ya eteyelo te.

⁶ Nayebaki ete losambo oyo ekómi moke mpo na koyamba bato, pe kofandisa bango malamumu na ntango ba. . . na ntango nazali koteya Liteya oyo, yango wana tosengelaki ko—kobongisa makambo ndenge mosusu. Pe na esika ete tozua mpo—mpokwa zomi ndenge tokanaki, ee, nazuaki bobele mayangani mibale na lomingo moko; lomingo ya lelo, lomingo oyo elandi, ná lomingo oyo ekolanda, mayangani mibale. Bongo, pe toyebisaki likambo yango te.

Pe, na bongo, soki moto moko ayokaki na lolenge moko boye ete mayangani ekobanda mokolo mwa ntuku mibale na mwambe, na ndako ya eteyelo, soki Nkolo ápésaka nzela, ee, soki ozali na baninga pe obombiselaki bango bisika ya kolala, soki ngai mbele na—na—natiki yango, bomoni, mpo ete—ete bango, tozui libaku ya kozua yango te. Bakoki te kozua ba—bandako ya eteyelo.

⁷ Sikawa nalingi koloba, ekozala bobele mayangani ya kopalanganisa Nsango Malamumu mokolo ya lomingo na ntongo. Mokolo ya lomingo na mpokwa nalingi kobondela mpo na babeli. Pe tozali kolikia ete Nzambe akokutana na bino baoyo bozali kobela. Nayebi te ndenge nini Billy akotala likambo na bino; nabanzi ete akokabola bakalati ya mabondeli, to, lolenge nini

akosala mpo na kobatela molongo kati na losambo. Kasi tokosala nyonso oyo ekoki mpo tobondela mpo na moto nyonso na póso misato oyo ezali kolanda, kati na mayangani oyo tokáni kosala, soki ezali mokano na Nkolo.

⁸ Na bongo mbala mingi masolo ya moto na moto pe ezalaka, moto nyonso alingi kaka akutana na yo mwa moke mpo na likambo moko to likambo moko ya ndenge wana. Pe toko . . . Bato boni awa basengeli na masolo ya moto na moto, botombola maboko. Oh! Nani asengeli na yango te? Na bongo tozali na . . .

⁹ Ekozala mwa mpasi mpo na kosala yango, na bongo bókoma malombo na bino pe botinda yango, bopesa yango epai ya Billy, bongo nakoki kozua yango wana. Pe, sikawa, akoyebisa bino, nabanzi, na oyo etali bakalati ya mabondeli, ntango nini bakokabola yango.

¹⁰ Bandeko na biso batei boni bazali awa na ntongo oyo? Tozuaki libaku te ya, nandimi te . . . Bopesaki bamosusu kati na bango maloba? Batei boni bazali awa na ntongo oyo, bokoki kotombola maboko? To, botelema. Totala batei boni bazali na losambo na ntongo oyo. Ee, malamumu! Totondi Nkolo mpo na mibali oyo. Elingaki kozala malamumu soki tozalaki na ntango ya kopesa moko na moko na bango maloba, kasi nayebi malamumu ete bomoni bango. Pe to . . . Nzambe ayebi bango na mosala na bango, pe tobondeli ete Nzambe apambola bango mingi. Pe, na ntembe te, mingi kati na bango bakangi ba-losambo na bango, mpo na kozala awa. Ndeko Junior Jackson ná, nabanzi, Ndeko Don Ruddell, pe kuna, liteya oyo ezali kokóma kino na balosambo na bango. Pe, lisusu, kuna na New York pe na bisika mosusu kati na ekólo mobimba, ezali kosalema na nzela ya telefone moko kino na losambo moko na moko na ntongo oyo.

¹¹ Nasepeli komona Ndeko Richard Blair awa. Nauti kotanga mokanda na ntina na likambo monene oyo Nzambe asalaki kati na bato kuna. Mokolo wana, ndenge nasosoli . . . Nakoki kobosana, Ndeko Blair; soki nabosani, sembola ngai. Azalaki kosala mosala, kosunga mobali moko mpo na kotia bansinga ya lotilíki na motuka oyo babongisi lokola ndako to eloko moko ya ndenge wana, nakanisi. Natangaki mokanda yango. Pe batiaki eloko moko malamumu te, pe, bongo, ememaki lotilíki kino na mai epai mwana mobali moko ya moke azalaki, oyo . . . nko—nkolo motuka yango, mwana na ye, azalaki mwana moke mpenza, pe ebomaki mwana yango. Libumu na ye evimbaki. Toyebi ete soki moto akangami na lotilíki, ezalaka bongo, soki akufi, esalemaka bongo. Miso na ye ezalaki lisusu koningana te; mino na ye ekanganaki.

¹² Bandeko batungisamaki mingi mpenza. Ndeko Blair alobaki ete akanisaki ete akokaki kozua ngai na esika moko boye, mpo nabondela mpo na ye, kasi amikaniselaki ete ekomami: “Esika bato mibale to misato bayangani mpo na Nkombo na Ngai, Ngai

nazali kati na bango.” Pe tata na ye azokaki mpota na misapi ntango azalaki komeka kokotisa misapi na monoko ya mwana yango, mpo afungola yango na makasi. Bongo bafukamaki pe babandaki kobondela mpo na mwana yango, pe azongaki na bomoi.

¹³ Ndeko Blair, ezali ya solo? Azali moko na bandeko na biso ya bosembo awa. Oh, mwana yango azali awa. Ee, matondi na Nkolo. Ezali malamamu. Tokolinga ete ótelema, mwana na biso. Sikawa, totondi molingami Nkolo mpo na yango. Oyo wana nde tata ya mwana yango? Yo nde tata yango? Ezali bongo. Pe Ndeko Richard Blair ye oyo. Nzambe na biso azali na makoki ya kosala ata eloko nini. Iyo, misie. Alakaki yango. Tozali kobika Liboso na Bonzambe ya Tata monene pe ya nkembo, oyo Azali na likolo. Pe biloko nyonso oyo to . . . ekoki kosalema soki tokoki bobele kondima yango.

¹⁴ Bomoni oyo yango esalaka, oyo yango efuti na bomoi ya mobali wana ndenge andimaki yango? Ebikisi mwana na ye. Sikawa, Nzambe azalaki na baombo na Ye ya bosembo kuna, mpo na . . . Ndeko Blair ná bamosusu, mpo na kobondela mpo na mwana yango ntango azalaki na lolenge wana. Iyo, soki likambo moko esalemi, bomikanisela, bozali bana ya Nzambe na bomoi.

“Esika bato mibale to koleka bayangani mpo na Nkombo na Ngai, Ngai nazali wana.” Ekomami pe lisusu: “Azali lisungi oyo ezangaka te na ntango ya mpasi.” Pe soki mpasi ekokaki kozala, ezalaki nde na ntango oyo mwana yango alalaki wana, ebembe, na mabelé, mpo na shoke ya lotiliki oyo elekaki na nzoto na ye. Na bongo tozali kotonda Nzambe na ntongo oyo, na motema mobimba, mpo na oyo, mpo na makambo oyo Asali mpo na biso.

¹⁵ Nzambe apambola pe mobali oyo, ya bosembo. Na ntango ya makambo ya mpasi koleka, yango nde ntango ya kotala epai na Nzambe. Botala epai na Ye, pe bózala baninga na Ye liboso ete makambo ya mpasi koleka, éyá. Toyebi likambo oyo. Soki tozui ngolu epai na Nzambe, tokoki kosenga Ye ata eloko nini, ndenge basengaka moninga nyonso, pe Azali lisungi oyo ezangaka te na ntango ya mpasi.

¹⁶ Lobi, na balabala, nakutanaki na ndeko mwasi ya Ndeko John Martin. Nazalaki . . . Moto moko atelemisaki ngai na balabala, bongo moto moko alekaki wana pe apesaki ngai mbote ya masuwa. Lokola nazongi epai na biso, boyebi, okomona bisika nyonso, bato bazali kotelema mpo na kopesa yo mbote, pe bongo na bongo. Bongo mwasi yango, nazali komikanisela ete babengaki ngai mikolo oyo, ete moto moko atutaki ye na nsima, na motuka, ebebisaki mokúwa na ye ya mokongo mobimba. Asengelaki kokóma ebósono bomoi na ye mobimba. Azali awa na liyangani na ntongo ya lelo, azali kosepela na Bozali ya Nzambe. Nauti kosolola na ye na biró. Nalingi kobondela lisusu elongo

na ye. Pe azalaki . . . Azali awa na esika moko boye. Nabanzi ete akokaki lisusu kozonga awa na kati te.

Kasi, awa, na ntembe te, afandi awa pembeni na biso. Ya solo. Ótelema mwa moke, ndeko mwasi, mpo bato bakoka . . . Botala mwasi oyo monganga alobaki, eleki mwa mikolo, ete akotambola lisusu te, oyo mokúwa na ye ya mokongo ebebaki pe nyonso, na likama—likama ya motuka. Pe ye wana atelema, na nzoto kolongonu.

Boyebi, Biblia elobi: “Pe bayebaki kozongisa monoko te, mpo ete moto yango atelemaki kati na bango.” Ya solo. Mwana oyo azongisami longwa na bakufi, ye oyo, pe mwasi oyo mokúwa na ye ya mokongo ebebaki, ye oyo, batelemi kati na biso. Esalemi kaka mikolo oyo, na bongo Azali motindo moko lobi, lelo, pe libela. Nkombo na Nkolo epambolama! Boni tosengelaki kozala na esengo ya kobika sikawa kati na Bozali na Ye, pe ya koyeba ete Azali lisungi oyo ezangaka te na ntango ya mpasi.

Nasepeli komona Ndeko Vayle, Ndeko Martin, pe bamosusu awa na ntongo oyo. Nkolo apambola bino mingi, bandeko. Sikawa ezali . . .

¹⁷ Nayebi ete awa na kati mopepe ya malili ekoki te, ná ebele ya bato oyo, kasi nde, ntango nalongwaki na Tucson mokolo wana, molunge ezalaki pene na mokama na minei to na mitano [pene na degré ntuku minei—N.D.T.]. Pe pene na midí ya butu, ezalaki ntuku libwa na misato [degré ntuku misato na minei], kasi oyo ezali mwa malamú mpo na ngai. Pe na Parker balobaki ete ekómaki na mokama na ntuku minei [degré ntuku motoba], mokolo ya mitano liboso ete tolongwa. Bokoki komikanisela molunge yango. Na ntembe te, ezali kati na biliki.

¹⁸ Pe, boye, mpo na mikolo ya lomingo misato oyo ezali kolanda. Lelo, mokolo ya zomi na mitano, nabanzi, ezali bongo, to mokolo ya zomi na motoba; mokolo ya zomi na mitano, boye te? Mokolo ya zomi na mwambe, ná mokolo ya ntuku mibale na mwambe, ná mokolo ya yambo na sanza ya mwambe, (ezali bongo?) Sanza ya mwambe. Mokolo ya ntuku mibale na mitano . . . Mokolo ya zomi na mwambe, mokolo ya ntuku mibale na mitano, ná mokolo ya yambo, mayangani ekozala awa na losambo. Bopanza nsango yango mingi te, boyebi, mpo ete, bomoni, tozali na makoki te ya kokotisa bato oyo bazali awa, baoyo bazali awa sikawa, na kati, boyebi, pe ekozala mpasi koleka. Bozonga kaka soki bokokoka.

¹⁹ Lisusu nazali awa mpo na kosanganisa bayangeli na misolo. Etungisaka ngai mwa moke ntango baboyaka kopesa ngai esika mpo na kosala mayangani, na ntango nazali komiyoka ete nakambami kosala yango. Na bongo nakanisi ete nakosenga soki tokoki te komema hema na biso pe—pe kotelemisa yango, pe kotikala wana, boyebi. Koya awa na libanda ya masano ya ndembo, to kuna na bilanga, pe komema yango bipai na bipai, ndenge Nkolo akokamba. Nazali koyoka ete yango nde eloko

oyo Akosala. Boyebi, emononeli moko ezali na ntina na yango. Pe nakanisi ete ekoki kozala na ntina na yango nde makambo oyo ezali kosalema . . . Sikawa, boyebi, mbala mingi tokanisaka ete ezali nsomo mpo ete makambo mosusu ezali kosalema, kasi, boyebi, ekoki kozala Nzambe, bomoni, nde azali kopusa yo kati na makambo yango. Ntango Alobi likambo, Akokokisa yango.

²⁰ Eleki mwa bampokwa, mingi kati na bino, kaka pene na sanza moko liboso ete nakende na Afrika, mbala mosusu mingi kati na bino bazali na bande yango, bino baoyo bozuaka ba-bande, likolo na, *Kopona Mwasi Na Libala*, oyo eteyamaki na Californie. Na mwa miníti ya suka ya bande yango, nazali lisusu koyeba te soki nazalaki kuna. Kasi Molimo na Nkolo eyaki na lolenge moko ya kokamwa mpenza. Nazalaki kopamela bango ndenge bazalaki kobika pe kosala, nzoka nde Nsango Malamu esilaki koteyama pe kosakolama mbala mingi liboso na bango. Na pwasa Molimo Mosantu alobaki na mongongo makasi pe alobaki: “Kapernaum,” bomoni, “engumba oyo emibengi na nkombo ya banje,” ezali nde Los Angeles, “omitomboli kino na Likolo, kasi okokita kino esika na bakufi.” Bomoni? Na nsima ntango esilaki, ee, nazalaki libanda, pe Ndeko Mosley ná Billy bazalaki elongo na ngai. Pe balobaki . . . Nazongaki mpo na kotala, pe bato ebele balalaki na nse, batei pe bazalaki kolela.

²¹ Pe nakendeki kozua Makomi. Nalobaki: “Likambo moko ezali kati na Biblia na ntina na yango.”

Pe ezalaki nde Yesu kopamela Kapernaum, bingumba nyonso ya pembeni na mbu oyo Asilaki kotala. Ee, Alobaki: “Kapernaum, omitomboli kino na Likolo, okokita kino esika na bakufi.” Alobaki: “Mpo ete soki misala misalemi kati na yo, misalemaki na Sodoma pe Gomora, mbele yango ezali naino kino lelo oyo.” Pe na ntango yango, Sodoma ná Gomora ezalaki na nse ya mbu.

Pe kaka na nsima, mbala mosusu mibu mokama to boni, nsima na esakweli ya Yesu, Kapernaum, engumba bobele moko oyo ezalaki pembeni na mbu oyo Asilaki kotala, koningana ya mabelé ezindisaki yango kati na mbu. Pe boyebi, yango ezalaki eyano sémba mpo na Californie, mpo na Los Angeles.

²² Na nsima, mokolo wana na Tucson, kaka ntango nazongaki, koningana monene ya mabelé esalemaki kuna. Pe moto ya zebi ayaki koyema yango na televizió. Ebimaki na bazulunále. Ete, mabelé, mokolo wana, epasukaki longwa na Bisanga ya Aleutian, kútu longwa na Alaska, pene na Bisanga ya Aleutian, oyo ezali na ntaka ya míle penepene nkama mibale [kilométele nkama misato—N.D.T.] na kati ya mbu, ezungaki kati na San Diego, ezingaki Los Angeles, pe ebimaki na San Diego. Epasukaki na satimétele ebele. Bandako ekwei. Bisika ya kolala ezindi.

Pe batunaki mituna epai na—na moto ya zebi oyo abengisamaki. Balobaki: “Ee, mokolo moko yango ekoki kozinda?”

²³ Alobaki: “Ekoki? Ekosalema nde!” Pe asalelaki maloba ya zebi mpo na kolimbola ndenge potopóto ya móto oyo ezalaka na nse ya mabelé. . . Yango nde esalaki ete mabelé eningana bisika nyonso wana, na San Diego pe bamboka ya nzinga-nzinga. Mabelé yango ezali polele na kati. Bongo nyonso esili kobanda kobukana, lokola zelo ezali kokweya, pe sikawa etikali kaka mposo ya mpamba. Pe epasukaki, na satimétele ebele. Bakokaki kozua radár ná biloko mosusu, pe kolanda bopasuki yango, mpo na kotia yango bilembo. Namonaki esika esalemaki.

Epasukaki lisusu, na satimétele ebele koleka, mbala mosusu pouce mibale to misato [satimétele mitano to nsambo—N.D.T.] mokolo wana, kaka nsima na kopesama na esakweli yango.

Pe baoyo bazalaki kotuna moto ya zebi wana mituna, balobaki: “Boye, mbala mosusu ekosalema na eleko na biso te.”

²⁴ Alobaki: “Ekoki kosalema na kati na miniti mitano to na kati na mibu mitano; kasi nde ekozinda.”

²⁵ Madame Simpson, nandimi te ete azali elongo na biso lelo oyo. To, namoni Ndeko Fred awa, kasi nayebi te esika Madame Simpson azali. Akendeki kozua esakweli oyo napesaki, na mobu 1935 to pene na yango, oyo elobi: “Ntango ekoya,” ekomami na buku na esika moko boye, “oyo mbu ekomifungolela nzela kati na biliki.”

Botala likambo ekosalema. Soki etando wana ya bankoto ya bakilométele ekweyi kati na potopóto ya móto oyo ezalaka na nse ya mabelé, pe etioli, ba-milió ya bato bakokufa na mbala moko. Pe ekomema mbóngé minene ya mai ya mbu na mokili! Bokanisa, ekokende kokota na mai ya Mbu Salton, oyo ezali na ntaka ya ba-pied mokama to nkama mibale [métele ntuku misato to ntuku motoba—N.D.T.] na nse ya mosanda ya mai ya mbu. Mai yango ekoki kokóma kino na Tucson, elongo na mbóngé ya mai ya mbu oyo ekokota kuna. “Pe mbu ekomifungolela nzela kati na biliki.”

Mabota ezali kopanzana, Yisalaele azali kolamuka,
Bilembo oyo basakoli na biso basakolaki;
Mikolo ya Mabota ekómi ya kotanga, etondi na nsomo;
Bozonga, E bapalangani, epai na bino.

²⁶ Tokómi na ntango ya suka. Sikawa, Nkolo apambola bino mingi. Nabandi koloba likambo yango pe nabosani ntango. Tokokota noki, nokinoki mpenza, kati na Seko, ata boni.

27 Sikawa na Malako, mokapo ya 7 pe na nzela ya 7, mpo na kotalisa likambo oyo totangaki na buku ya Ntango ya Liboso 13. Mpo na kotalisa yango, nalingi kotanga Malako 7:7.

. . . *bakosanzolaka ngai mpamba, bakolakisaka malakisi mazali mibeko na bato.*

28 Sikawa, nayebi eloko mosusu te bobele Nsango oyo Nkolo apesi ngai, pe nyonso oyo nakoki kolobela yango wana. Sikawa, nakoloba na ntongo oyo likolo na liteya moko, oyo nakanisi ete ekozala malamumu. Pe na mpokwa ya lelo nalingi koloba likolo na “bilei na ntango oyo elongobani,” soki Nkolo alingi: *Bilei Ya Molimo Na Ntango Oyo Elongobani*, pe ndenge nini koyamba Yango. Sikawa, na ntongo oyo: *Komeka Kosalela Nzambe Mosala Libanda Ya Mokano Na Nzambe.*

29 Nzambe azali mokonzi. Pe tomoni awa likambo oyo Dawidi asalaki, ntango totangi Makomi na Ntango ya Liboso 13. Pe azalaki . . . Bamposa na ye ezalaki malamumu. Kasi Nzambe akumisaka biso mpo na bamposa na biso ya malamumu te. Nzela ezali bobele moko mpo na kosalela Nzambe, ezali nde kosala mokano na Ye ndenge Apesi mitindo. Pe Nzambe, lokola azali mokonzi, moto moko te akoki koyebisa Ye eloko oyo Asengeli kosala to ndenge ya kosala yango. Asalaka yango na ndenge oyo Ayebi ete ebongi mpo na kosala yango. Likambo yango esepelisi ngai. Esengelaki kosepelisa biso nyonso, pe nayebi malamumu ete esalemi bongo. Mpamba te, moko akolinga ete *Eya boye*, mosusu akolinga ete Ekende *kuna*, pe oyo mosusu ete Etambola ndenge mosusu.

30 Kasi eloko mosusu, ya monene, epai na Nzambe, ezali ete Atiki biso te, sikawa, kozanga koyeba oyo Solo ezali pe ndenge ya kosalela yango. Akokaki kozala sembo te, ete Átika biso tóbeta libaku, bongo Apesa biso etumbu mpo ete tosali likambo oyo toyebaki ndenge ya kosala yango te. Azali Nzambe ya ndenge wana te. Azali Nzambe oyo alobaka Liloba pe Azelaka ete bana na Ye bandima Yango. Pe, yango wana, Ayebi oyo eleki malamumu, ntango ya kosala yango, pe ndenge ya kosala yango. Bisu tozalaka na makanisi ya biso moko mpo na yango, kasi Ye ayebi.

31 Na bongo soki Abongisi lolenge moko boye, ya makambo oyo Akosala, pe Ayebisi biso te eloko nini ekosalema pe ndenge nini ekosalema, bongo biso, soki tobeti libaku mpo na yango, toko—tokolongisama kati na—na mabaku na biso; to soki tomeki kosala eloko moko boye, moko na moko akolongisama. Kasi nzela ezali bobele moko, pe ezali nde Liloba na Ye.

32 Likambo mosusu, Dawidi awa, tomoni ete na motema na ye azalaki na mposa ya kosala likambo ya malamumu. Eloko oyo epusaki ye ezalaki mabe te, to ntina oyo azalaki kolanda ezalaki mabe te. Kasi, ndako, to sanduku na Yawe, ezalaki mosika na—na bato, pe azalaki na mposa ya kozongisa sanduku na Nzambe

na esika na yango, mpo ete bato báluka toli epai na Nzambe mpo na makambo oyo balingaki.

³³ Na esika ete—ete tótika likambo yango, biso . . . Bongo soki Ndeko Blair ná tata ya mwana moke wana bálobaka: “Ee, ezali mpenza mawa, mwana akangami kaka, pe akufi. Nabanzi, ezali bobele eloko moko boye nde esalemi”? Kasi bakendeki nokinoki epai na Nzambe.

³⁴ Bongo soki mama moke oyo, ná mobali na ye, motei ya Nsango Malamu, eleki mwa bampokwa, to mwa mikolo, ntango mokúwa ya mokongo ya mama moke oyo auti kotelema awa ebebaki. . . Monganga alobaki: “Akotambola lisusu te na bomoi na ye mobimba.” Bongo soki ye na mobali na ye bálobaka: “Ee, molingami, tokomibondisa kaka mpo na yango”? Kasi nokinoki basalaki likambo moko mpo na yango; bakendeki epai na Nzambe. Ndakisa oyo tokoki kozua ezali mingi kati na Biblia, mpo na kotalisa ndenge bato bakendeke epai na Nzambe na ntango ya mpasi!

³⁵ Malamu, bongo, na eleko wana, bazalaki na esika ya bokutani bobele moko epai bakokaki kokutana na Nzambe, ezalaki nde liboso na sanduku, na nse na makila. Yango nde esika ya bokutani bobele moko kino lelo, na nse na Makila. Ebongana-mawa ezalaki komwangisama, mpo na kopesa mosambeli ngolu, to moto oyo ayei kobondela, ntango ayei kobondela Nzambe. Pe Nzambe azalaki na momesano ya ndenge mosusu, nzela oyo basengelaki kolanda, mpo na likambo yango, pe Azalaki kondima eloko mosusu te. Azalaki kondima lolenge mosusu te; kaka nzela oyo Akanaki.

³⁶ Eumeli te nateyaki Liteya moko, mingi kati na bino bayebi Yango, ete, esika ezali bobele moko epai Nzambe akutanaka na mosambeli, esika oyo Alobaki: “Nakotia Nkombo na Ngai.” Soki tokoki komona lingomba oyo Atiaki Nkombo na Ye kati na yango, na ntango wana nde tozui esika yango. Alobaki: “Nakopambola yo na bikuke nyonso te; bobele na bikuke oyo kati na yango Natii Nkombo na Ngai. Nakotia yango kaka na esika moko, pe osengeli kokutana na Ngai kuna; pe yango nde esika bobele moko oyo Nakokutana na yo.” Pe tomonaki, na liteya yango, esika Atiaki Nkombo na Ye, pe yango nde esika bobele moko oyo Akutanaka na mosambeli. Pe Nkombo na Ye ezalaki Yesu Klisto. Nkombo na Nzambe ezali Yesu Klisto.

³⁷ Yesu alobaki: “Ngai naye na Nkombo ya Tata na Ngai.” Mwana nyonso ayaka na nkombo ya tata na ye. Pe Ye ayaki na Nkombo ya Tata na Ye.

“Nkombo mosusu te esili kopesama awa na nse kati na bato,” ata soki babengami ba-Methodiste, ba-Batiste, ba-Presbiterien, lingomba ya Klisto, to nkombo nini. Esika ya bokutani ezali bobele moko oyo Nzambe akutanaka na moto, pe ezali nde ntango azali kati na Yesu Klisto, esika bobele moko. Pe makambo

nyonso ya kala oyo ezalaki na ntango ya Kondimana na Kala, ezalaki elilingi na yango. Nalingi ete bososola yango malamumu mpenza. Sikawa, ezali liteya ya eteyelo ya lomingo. Nazali na biteni ya Makomi ná mwa makambo nakomáki awa. Namonaki ete ekoki kosunga bino mpo na kososola, mpamba te makambo nyonso ya kala esalemaki mpo ete ézala ndakisa epai na biso.

³⁸ Sikawa, tomoni ete Nzambe azalaki na lolenge moko ya kosala makambo. Kasi Dawidi, oyo autaki kopambolama na Nzambe, ndenge esalemaki mpo na ye, pe akómaki mokonzi, amonaki ete akokaki kosala likambo moko boye mpo na Nzambe, ata boni. Kasi asalaki yango na lolenge oyo elongobani te.

³⁹ Tomoni ete, Nzambe amonisaka Liloba na Ye na ntango oyo Ye Moko abongísá. Sikawa, ndenge nini Martin Luther akokaki koyeba Nsango ya lelo? Ndenge nini ba-Presbiterien? Ndenge nini Martin . . . to lingomba Katoliko bakokaki koyeba nsango ya Martin Luther? Ndenge nini John Wesley akokaki koyeba nsango ya Luther? Ndenge nini Wesley akokaki koyeba nsango ya ba-Pantekotiste? To ndenge nini ba-Pantekotiste bakokaki koyeba Nsango oyo? Bomoni? Amonisaka Yango na bileko na Ye, mpo ete Ezali Momboto. Pe ntango Ezali kokola pe kokomela, Ye Azali komimonisa.

⁴⁰ Lokola molunge ya moi, mpo na kofungola yango. Ntango ezali petepete pe elenge, ekotóisa momboto yango na mabelé; na nsima ekopesa yango nkasa, na etape mosusu ya moi. Moi makasi ekoboma yango soki ekómi momboto ya kokomela . . . to ntango ya kokomela. Na bongo, Abongisaka moi pe Abongisaka ekelamu, mpo élongobana na Liloba na Ye.

Abongisaka Lingomba, baponami, Mwasi na libala, mpo balongobana na ntango oyo bazali kobika kati na yango.

⁴¹ Ata ekelamu yango moko ezali koloba na biso lelo, wana tozali komona bikólo kopanzana, mabelé kobukana, likomi etiami na etutu. Tozali komona lingomba pe lolenge ekómi.

Tozali komona Mwasi na libala pe lolenge Akómi. Pe toyebi, na nzela na ekelamu, ete Lingomba ezali komilengele mpo na kokende. Ntango kitoko nini boye! Ezali ntango oyo basakoli nyonso bazalaki na mposa makasi ete bamona, eleko oyo.

⁴² Sikawa, Amonisaka Liloba na Ye bobele na ntango na Yango. Martin Luther atangáká bobele Biblia oyo biso tozali kotanga. Wesley atangáká bobele Biblia oyo Martin Luther atangáká. Ba-Pantekotiste batangaka bobele Biblia oyo biso tozali kotanga. Yesu azalaki kotanga bobele Biblia oyo Bafalisai bazalaki kotanga, kasi bango bazalaki . . . Bazalaki komeka kobatela lisangu na lolenge na yango ya ebandeli, na ntango oyo yango ezalaki kokomela, bazangaki komona eleko na bango.

Sikawa, awa pe Dawidi asali bobele likambo yango.

⁴³ Nzambe amonisaka Liloba oyo na eleko, pe epai na moto oyo Aponi komonisa Yango epai na ye. Nzambe nde aponaka moto oyo Ye akomonisa Yango epai na ye. Aponá yango liboso na kozalisama na mokili. Ayebaki misala na Ye nyonso liboso, pe ebombamaki na miso na moto. Amonisaka yango kaka ndenge Alingi. Ezali nde ntango oyo Asílá kopona, moto oyo Asílá kopona. Aponá naino etonga moko to lingomba moko boye te; ezalaka nde moto oyo Aponámá, Asalaka nde bongo.

⁴⁴ Nani yango akomeka kosembola Ye, pe koloba: “Sikawa, Nkolo, Osalaki libunga ndenge otiaki mobali *oyo* na mosala ya koteya. Mobali *oyo* andimaka lokola biso te”? Nani akoloba na Nzambe ete akwei na likambo yango? Ekosengela kozala moto moko oyo azali na mwa mobulu koleka ngai, mpo na kolobela Ye bongo. Ayebi oyo Azali kosala. Ayebi nani Asengeli kopona pe nani kotika, nini kosala pe ntango nini kosala yango. Ata boni tokoki tokanisi ete moto songolo akoki mpo na mosala boye, Nzambe ayebi nani akoki mpo na ntango pe eleko wana, to ntango pe ntango oyo elongobani mpo na kosala yango.

⁴⁵ Pe Moklisto ya solosolo; mondimi ya solosolo ya Nzambe, atiaka motema epai na Nkolo mpo na makambo oyo. Tia motema na mosala na yo ya koteya. Soki oyoki kobengama, luka óyeba malamuru ete ezali ya sembo. Luka óyeba malamuru ete makambo oyo ozali koloba elongobani na ntango. Biblia elobi: “Baoyo batiaka mitema epai na Yawe bakozua nguya na sika. Bakopumbwa likolo na mapapu lokola mpongo. Bakopota mbango nde bakolemba te. Soki bakotambola, nde bakosenzua te.”

⁴⁶ Botala Dawidi, mokonzi na Yisalaele, oyo autaki kopakolama. Samwele nde asopaki mafuta likolo na ye, pe aponamaki na Nzambe, mpo na kozala mokonzi na Yisalaele. Bongo Dawidi azuaki emoniseli oyo, ya komema sanduku na Yawe kino na engumba ya Dawidi. Sikawa, likambo ya mabe ezali te, kasi, bomoni, Dawidi asalaki yango mabe.

⁴⁷ Sikawa, ezali komonana lokola ete soki moto ya lolenge wana azui emoniseli, moto monene lokola mokonzi oyo Nzambe aponaki, mokonzi oyo aleki monene oyo asílá kozala na mokili, longola bobele Klisto, nabanzi, ete ezalaki Dawidi, mpo ete Klisto azali Mwana na Dawidi. Nde, moto oyo aleki monene, oyo autaki kopakolama, oyo autaki na Bozali mpenza ya Nzambe, azuaki emoniseli ya kosala likambo moko mpo na Nzambe, pe alingaki mpenza kosala yango mpo na Nzambe; kasi emoniseli yango ezalaki mabe. Sikawa, ezali likambo monene. Ekotambola elongo na liteya na biso: *Komeka Kosalela Nzambe Mosala Kozanga ete obengama Mpo Na Kosala Yango*.

⁴⁸ Botala malamuru, Dawidi azuaki emoniseli. Pe botala malamuru, mosakoli Natana-ele te moto azuaki emoniseli yango. Ezalaki nde Dawidi, mokonzi, moto azuaki emoniseli yango. Balukaki

pe toli epai ya Natana-ele mpo na yango te. Alukaki toli epai ya Natana-ele te. Kasi bomoni awa, na buku ya Ntango ya Liboso, alukaki toli nde epai na mikóló na nkoto, pe mikóló na nkama? Alukaki toli epai ya Natana-ele te. Alukaki toli epai na bato, alukaki pe toli epai na banganganzambe pe bato ya likindo ya eleko wana, bakomeli pe bato ya likindo. Dawidi alukaki liboso toli, alobaki: “Soki yango, likambo oyo, euti na Nzambe, tokende komema sanduku na kondimana ya Nzambe na biso, kino na engumba, mpo tobanda kolukaka toli epai na Nzambe liboso na kosala makambo.”

⁴⁹ Elobami, na ntango ya Saulo, ete “Bazalaki lisusu koluka toli epai na Nzambe te, liboso na—na—na sanduku, Urim, Urim Tumim. Bazalaki lisusu kosala yango te.”

Dawidi alobaki: “Tozonga sikawa epai na Nzambe, biso nyonso! Tozonga epai na oyo ya solosolo. Tokende kokamata sanduku pe tomema yango awa, tomema Bozali na Nzambe,” na elobeli mosusu, “kati na engumba. Tosala mayangani ya kolamuka. Tozongisa bato.” Kasi azuaki emoniseli, oyo emonanaki lokola malamumu, kasi ezalaki mokano na Nzambe te.

⁵⁰ Na esika ete átuna liziba oyo asengelaki kotuna, alukaki toli epai na mikóló ya mapinga, mpo ete autaki kokóma mokonzi. Pe alandaki molongo ya makanisi yango, oyo ya bakonzi ya basoda na ye pe ya bato na ye minene.

⁵¹ Na nsima akendeki epai na lingomba ya nkombo pe atunaki soki bakokaki kozua kolamuka. Banganganzambe, bakomeli, mikóló na nkoto, mikóló na nkama, pe alukaki toli epai na bango. “Likambo oyo ezali mokano na Yawe?” Pe balobaki ete ezali bongo. Kasi, bomoni, azangaki kotuna liziba ya motuya oyo Nzambe asalelaka ntango nyonso. Bomoni, azangaki kososola yango.

⁵² Kasi makanisi na ye ezalaki malamumu. Mposa na ye ezalaki malamumu. Ntina oyo azalaki kolanda ezalaki malamumu, komema kolamuka kati na engumba, kozongisa libota epai na Nzambe. Kasi alukaki toli te na ndenge oyo Nzambe ayebisaki ye. Bomoni?

⁵³ Atako bato nyonso bandimaki, ná banganganzambe, ete mokonzi azalaki na elonga, “Bazalaki na mposa ete sanduku ézonga kati na engumba. Na bongo, bazalaki na mposa ya Bozali na Nzambe. Bazalaki na mposa ya kolamuka.” Kasi Nzambe alakaki te ete Akomonisa Liloba na Ye, na ntango na Yango, epai na bato. Alakaki te ete Akomonisa Yango epai na mokonzi, na ntango yango. Nzambe abongwanaka te, ata moke te. Alakaki te ete Akosala yango.

⁵⁴ Ata ndenge nini bato bazali sembo, ná mposa malamumu, pe bazali kolanda ntina malamumu, ná ndenge nini bato balingi makambo yango pe bazali komona bosenga na yango, esengeli ete mokano ya Nzambe esalema kati na makambo wana. Yango

nde eloko nalingi ete ékota malamu mpenza kati na bino, mpamba te nalingi kosala bongo na ntina ete bósengela komona yango soki—soki Molimo na Nzambe efandi kati na bino. Pe yango wana nde nazali koumela awa mingi boye. Ezali te mpo na kozua ntango na bino baoyo bozali kolanda na telefone, pe na nzela ya nsinga, kasi na—nalingi ete bósosola yango. Soki ozali na ntango te, na bongo luka ózua bande oyo. Ete . . .

⁵⁵ Ata ndenge nini bato bazali na bosenga na yango, ata ndenge nini bato nyonso bandimi ete bazali na bosenga na yango, ete yango ezali Solo, etikali likambo moko ya koyeba. Ezali mokano na Nzambe?

Nzoka nde, Nzambe alakaki te ete Akomonisa basekele na Ye epai na Bakonzi na Ye, ete Akomonisa basekele na Ye epai na bato na Ye.

⁵⁶ Ezali lokola likambo oyo esalemaki na ntango ya Mikaya, mwana ya Yimila. Wana, totiki makomi na biso te, kasi toleki na eleko mosusu, mpo na kokotisa likambo oyo pe kokómisa yango solo mpo na bino, solo mpenza mpo na bino, na lolenge ete bozanga yango te.

⁵⁷ Mokolo moko, na eleko ya Mikaya . . . Azalaki mobola, autaki pe na libota ya babola. Kasi, Akaba, mokonzi na Yisalaele, lokola ekólo oyo ezalaki kotosa Nzambe, asaláká eteyelo pembeni mpo na kobokola basakoli oyo bazalaki koponama na eyongi nyonso, pe azalaki na bango nkama minei kati na eteyelo yango. Bazalaki bato minene. Bazalaki bobele basakoli ya lokuta te. Bazalaki basakoli ya Baebele, mibali ya solosolo. Bato bazalaki koluka toli epai na Yawe na nzela ya mibali oyo. Pe bazalaki kosakola. Kasi, bomoni, ntango mama na likambo eyaki, bango nyonso bazalaki libanda na Liloba pe na mokano na Nzambe. [maloba mazangi na eteni oyo ya bande—N.D.E.]

⁵⁸ Mpamba te Yosafata ayaki longwa na Yelusaleme mpo na kokutana na—na mokonzi Akaba, balataki bilamba na bango, bafandaki na—na ekuke, pe bamemaki basakoli liboso na bango. Liboso, Akaba alobaki: “Esika moko ezali awa na Lamoto-Gilada oyo, solo mpenza, ezali ya biso.” Sikawa, ezali YANGO ELOBI NKOLO. Yosua nde akabolaki yango mpo na libota pe apesaki bango yango, kasi bafilistia babotóláká yango.

Pe alobaki: “Tala, bana na biso bazali na nzala, tozali pe na mabelé oyo ekoki te mpo na kobimisa lipa uta na yango. Pe banguna na biso, Bafilistia, bazali koleisa bana na bango, bapagano, uta na mabelé mpenza oyo Yawe Nzambe apesá biso.” Ekei mpenza sémba. Pe alobaki: “Tala, biso, libota na Nzambe, tofandi awa ná bana na biso, na nzala, wana banguna na biso bazali koleisa bana na bango na mabelé oyo mpo na yango Nzambe abimisaki biso na Ezipito pe apesaki biso yango.” Yango ekosala ete moto na likindo atomboka, boye te? Alobaki: “Boye tókende kokamata mabelé na biso oyo Nzambe apesá biso?”

⁵⁹ Yosafata alobaki: “Iyo, nakosunga yo. Tozali bandeko. Yo ofandi na Yuda, pe ngai nafandi na—nafandi na Yelusaleme.” To—to, nakesenisi yango? Nabanzi . . . Te, ezali bongo. Nakanisi ete yango . . . Yosafata.

Ata bongo, Yosafata azalaki moto malamumu, mokonzi, moyengebeni oyo alingaki Yawe. Akaba azalaki mondimi ya mwa móto moke. Na bongo bamemaki bango wana, pe Yosafata alobaki: “Boyoka, toluka liboso toli epai na Yawe. Tosengeli koluka koyeba likambo yango malamumu.” Bomoni, soki Dawidi akokaki kosala lokola Yosafata! Alobaki: “Tosengelaki kosala boye te?”

Pe nokinoki, lokola azalaki Moisa laele, Akaba alobaki: “Solo mpenza. Nazali na Baebete, lokola biso, nkama minei, basakoli ya Baebete ya ebongiseli na biso moko. Nakoluka toli epai na bango. Bazali basakoli.” Sikawa, bomoni, kaka . . .

⁶⁰ Olobi: “Ezali kobetisa ngai libaku, Ndeko Branham. Mosakoli?” Oh, iyo. Moko azalaki na ntango na Yilimia, oyo alobaki ete balingaki kozala kuna bobete mibu mibale. Yawe alobáká na Yilimia, “ntuku nsambo.” Atiaki ekangeli na nkingo na ye, pe mosakoli oyo abukaki yango, ezalaki Hanania. Kasi boyebi likambo nini ekomelaki ye? Oh, iyo. Esengeli ete botikala na Liloba.

Na bongo basakoli yango bayaki pe basakolaki, balobaki: “Kende! Yawe azali na yo.”

⁶¹ Pe moko na bango, (nabosani nkombo na ye sikawa) nabanzi ete ezalaki mokonzi, Sidikiya, nabanzi, alobaki, alataki maseke mibale ya ebende pe alobaki: “YANGO ELOBI YAWE. Na maseke oyo,” moto yango azalaki mpenza sembo, “okozongisa monguna na yo kino na mabele na ye, pe okokamata biloko ya Nzambe. Epesameli yo.” Nandimi te ete azalaki moto na bilongi mibale. Nandimi ete azalaki moto malamumu. Nandimi ete basakoli nyonso wana bazalaki bato malamumu.

⁶² Olobi: “Basakoli?” Iyo! Bomikanisela, kaka moto oyo andimaki ete baboma Yesu Klisto, asakolaki pe, mpo ete ezalaki lotomo na ye. Ye nde azalaki nganzambe mokonzi na mobu wana. Lokola ye moto azalaki na lotomo wana, pe azalaki kosala lotomo yango, Molimo na Nzambe eyaki likolo na ye. Elingi koloba te ete abikisamaki to likambo nini mpo na yango. Pe asakolaki, Kaifa, mpo ete lotomo na ye nde esalaki yango.

⁶³ Pe basakoli oyo, lokola bazalaki basakoli, na lotomo ya basakoli, basakolaki. Pe Molimo na Nzambe eyaki likolo na bango, mibali yango bazalaki na makabo ya Molimo.

⁶⁴ Nasosoli ete nazali kolobela nde ntuku libwa na libwa likolo na mokama ya ba-Pantekotiste. Kasi moto, mbala mingi, moto, Nzambe akoki kosalela ye, kopesa ye likabo, kasi bato bakotungisa moto yango mingi. Soki mpenza abengami te pe atindami na Nzambe te, bakosala ete mobali to mwasi yango

áloba likambo oyo ezali mokano na Nzambe te, mpo ete bato bazali kopusa ye ete ásala yango.

⁶⁵ Ndenge nasengelaki kopamela mokengeli na biso awa mpo na yango. Mokolo moko awa na zamba, pene na ngonga ya misato ya ntongo, Alobaki: “Kende koyebisa Ndeko Neville!” Nayaki kokutana na yo, boye te, Ndeko Neville?

⁶⁶ Bato nyonso: “Ndeko Neville, sakola mpo na ngai. Yebisa ngai *boye to boye*.” Bomoni, bokoki bongo kopusa ye ete ábanda koloba makambo oyo ekokokisama te.

“Baoyo batiaka mitema,” mpo na koyeba oyo Nkolo alingi ete ésalema. Bomoni?

⁶⁷ Bongo mibali oyo batalaki likambo yango na miso ya bomoto: “Ezali ya biso.” Kasi, bomoni, balukaki Liloba pe mokano na Nzambe te.

⁶⁸ Na nsima Mikaya ayaki, pe azuaki emononeli. Alukaki liboso koyeba, botala. Alobaki: “Bozela. Bopesa ngai butú ya lelo. Botika ngai naluka koyeba, pe lobi mbala mosusu nakopesa bino eyano.” Awelaki te koloba: “YANGO ELOBI YAWWE,” lokola, ete azalaki na boyokani ná basakoli oyo mosusu. Alobaki: “Nakoloba bobele oyo Nzambe akoloba.”

Pe mokolo oyo elandaki, tomoni, Nzambe ayebisaki ye oyo elingaki kosalema. Ekesanaki mobimba na oyo bamosusu balobaki. Ekesanaki na oyo eteyelo mobimba balobaki. Kutu moko na bango apusanaki pe abetaki ye mbata na elongi, mpo na yango. Kasi, bomoni, azelaki. Bongo na nsima, akokanisaki esakweli na ye, emononeli na ye, ná Liloba oyo ekomami, pe elongobanaki na Liloba.

⁶⁹ Soki moto alobi ete “azui emoniseli ya kobatisa bato na Nkombo na “Tata, Mwana, Molimo Mosantu,”” yango ekesani na Liloba. Moko te kati na bango nyonso asálá yango. Ntango balobaka ete, “Oh, tokozua ngámbo oyo, pe *boye* na *boye* pe *boye*,” pe bongo na bongo, yango ekesani na Liloba. Ntango balobaka ete “bandimaka momboto na nyoka te,” yango ekesani na Liloba. Makambo mosusu nyonso oyo, ekesani na Liloba. Yango esengeli kolongobana na Liloba pe na ntango.

⁷⁰ Sikawa, soki Dawidi asalaki bobele bongo. Sanduku esengelaki koya, kasi na ntango wana te; esika mpo na yango ezalaki te.

⁷¹ Botala sikawa ntango bakendeki kozua sanduku, bato na lokumu nyonso balobaki: “Yango nde likambo oyo esengeli kosalema, Dawidi. Nkembo na Nzambe! Tosengeli na kolamuka.” Ezali mpenza Pantekote ya lelo; ba-Batiste, ba-Presbiterien. “Dawidi, ozali mokonzi na biso! Yo nde . . . Kapitáni *Songolo*, Major *Pakala*, ná Jeneral *Fulani*, bakoza na mitingi na yo. Ee, bazali koloba ete yango mpenza nde likambo

oyo esengeli kosalema, Dawidi. Ekólo mobimba bazali nsima na yo.”

Yango nde ezali kosalema lelo. Nazali na mposa ya ekólo te. Nazali nde na mposa ya Nzambe, ata soki moto mosusu azui ngámbo na ngai te.”

⁷² Dawidi azalaki na mikóló nyonso ya mapinga. Azalaki na boyokani na mapinga ya basoda. Azalaki na boyokani na bibongiseli nyonso, na bato na likindo nyonso, na bato nyonso, bato nyonso bazalaki na boyokani na ye. Ezalaki pe bongo mpo na Akaba, pe bamosusu kati na Makomi; kasi azalaki na Nzambe te, mpo ete azalaki libanda na mokano na Nzambe. Nazali kolikia ete tososoli likambo oyo.

⁷³ Botala, basalaki makambo nyonso ya losambo oyo bakokaki kosala. Ntango mosusu bapanzaki nsango pe bongo na bongo, “Kolamuka monene! Sanduku ekozongisama. Tokozua kolamuka. Tokosala likambo *boye*.”

⁷⁴ Botala, atindaki bayembi. Atindaki bato ná banzenze, ná bakelelo, pe basalaki makambo nyonso ya losambo oyo basengelaki kosala; kasi ata bongo Nzambe azalaki kati na yango te.

Tozali komona yango kosalema lisusu mwa moke, boye te?

⁷⁵ Bazuaki bayembi nyonso. Bazuaki babeti nzenze, bayúli kelelo; basi, mibali, pe moto nyonso oyo azalaki moyembi. Bamemaki bango nyonso kuna, pe babikelaki makambo nyonso ya losambo.

Nalingi koloba likambo oyo te, kasi esengeli ete naloba yango. Ezali ndenge moko mpo na bibongiseli oyo lelo, ba-Pantekotiste pe bango nyonso, bazali kobikela makambo nyonso ya losambo, koyemba pe koganga.

⁷⁶ Botala, Dawidi agangaki na makasi na ye nyonso, agangaki na mongongo makasi, apimbwaki, pe abikelaki makambo nyonso ya losambo oyo ekokaki kozala; kasi ata bongo Nzambe azalaki kati na yango te. Eloko oyo epusaki ye, ná ntina oyo alandaki, nyonso wana ezalaki malamú; kasi asalaki yango mabe. Bomoni? Abikelaki makambo nyonso ya losambo; agangaki, ayembaki, azuaki bayembi mpo na libaku yango, bato ya kogánga, pe nyonso mosusu. Babinaki na molimo. Basalaki nyonso oyo ezalaki ya losambo.

⁷⁷ Ezalaki lokola ba-kampanye minene ya ntango na biso. Balingi ete balonga mokili mobimba mpo na Klisto. Likambo ya boye ezalaka te. Kolamuka minene mpenza, makambo minene ezali kosalema; soki bakokaki bobele kososola, ete ntango wana esili koleka. Akweisami. Kasi bazali kotonga, kosala ba-kampanye, bibongiseli, pe nyonso. Kasi, mbano na yango ekokani mwa moke na oyo esalemaki na ntango ya Dawidi, etambolaki te.

78 Tozali kokende kobanda kolamuka. Bapalanganisi na biso minene ya Nsango Malamu lelo, bamosusu kati na bango, balobaka ete bazui bato nkoto ntuku misato oyo babongoli motema, kati na póso motoba; pe mbula moko na nsima, soki bazongi, bakokuta bato ntuku misato te. Likambo moko ezali kotambola malamau te. Likambo yango, ezali kaka likambo oyo Dawidi asaláká. Bato na lokumu, bato minene, batei minene, biteyelo minene, bakonzi minene, kasi ata bongo bazali koluka toli epai na bibongiseli ya kala na esika bátala mpenza Liloba na Nzambe mpo bamona soki eleko yango ekómi. Biloko mosusu balonaka yango bobele na eleko na yango kati na mobu.

79 Sikawa totala nini esalemaki. Atako . . . Koningana na bango pe makambo na bango ya losambo ezalaki mpenza malamau, bamposa na bango ezalaki mpenza malamau, ba-kampanye na bango ezalaki mpenza malamau, koyemba na bango ezalaki mpenza malamau, kobina na bango ezalaki mpenza malamau, koganga na bango ezalaki mpenza malamau, mizíki na bango ezalaki mpenza malamau, pe bazalaki na sanduku. Ntina nini kozala na sanduku soki Nzambe azali te? Ezali bobele sanduku ya mabaya, bitando mibale ya mabanga.

Ezali lokola kolia elambo, kozua libatisi. Ntina nini kozua libatisi soki naino obongoli motema te? Bolamu nini ekosala, kolia elambo, kokóma mokosi, soki obiki bomoi malamau te pe ondimi Liloba na Nzambe mobimba? Soki okamati eteni na Yango, kasi otiki eteni mosusu, etalisi ete likambo moko ezali kotambola malamau te.

80 Sikawa, ntango makambo nyonso oyo ezali kosalema, totala sikawa nini esalemaka soki bokanisi Nzambe te, eleko na Ye pe ntango na Ye te; bobele likanisi ya bato.

81 Bato mingi balobaki na ngai: “Mpo na nini oyei awa te mpo na kosala liyangani? Boye, tobengisi yo. Tia loboko na *oyo*, na *oyo*, to *oyo kuna*.”

Bozelaka! Bokoki kozala na mposa na yango, kasi Nzambe alobi nini mpo na yango? Bato mingi balobaki na ngai . . . Nasílá kozua mbela, nasílá kozala na masolo na bato, masolo ya moto na moto pe bongo na bongo, oyo bazelaki mbula mobimba liboso ete nayanola. Bozelaka! Ndenge nini nakoyeba likambo oyo nasengeli koloba soki Nzambe ayebisi ngai te likambo oyo nasengeli koloba? Bomoni, esengeli ete bozelaka! Yango wana nalobaki: “Bokoma yango. Botika ngai natala oyo Ye alobi.” Bomoni? Bozelaka! “Baoyo batiaka mitema epai na Yawe bakozua nguya na sika.” Ya solo?

82 Botala, balukaki toli bobele epai na banganganzambe ya ntango wana, bato na likindo, bibongiseli. Pe botala, lokola basalaki bongo, balukaki toli epai na banganganzambe pe balukaki toli epai na losambo, balukaki toli epai na bato, basalaki yango na ndenge elongobani te.

⁸³ Botala, sanduku ezalaki Liloba. Toyebi ete ezali ya solo. Mpo ete, sanduku ezali Klisto, pe Klisto azali Liloba. Bomoni? Sanduku, to Liloba, etiamaki te na esika na yango ya liboso, oyo ebongisamáká, oyo ebongisamáká na ebandeli. Oh, lingomba, bozanga te kososola likambo oyo!

Nyonso ezalaki malamumu be, pe nyonso emonanaki lokola ete ezalaki malamumu, lokola ete kolamuka moko ya monene ezalaki koya; kasi mpo ete bazangaki koluka toli mpo na likambo yango epai na moto oyo asengelaki! Balukaki toli epai na banganganzambe, balukaki toli epai na bato na lokumu, balukaki toli epai na bato na likindo, balukaki toli epai na bayembi, pe bango nyonso basanganaki na boyokani, mapinga pe ebongisamaki malamumu, pe lisusu ba—ba—basoda ya ekólo. Nyonso ezalaki na boyokani mpo na mitíngi monene, kasi bazangaki koluka toli epai na Nzambe. Lokola Akaba asaláká, lokola bamosusu basaláká. Ntango nini boye!

⁸⁴ Sikawa bozanga likambo oyo te. Bango bazangaki kososola yango, mpo ete balukaki toli te. Pe lokola basalaki bongo... Botala malamumu. Lokola bakendeki epai na banganganzambe, lokola bakendeki epai na bato na likindo, pe lokola bakendeki epai na mapinga ya basoda, kasi lokola bakanisaki ata te motindami ya ntango oyo Nzambe atindelaki bango, Natana, basalaki yango na ndenge elongobani te. Bakendeki kokamata sanduku pe batiaki yango likolo na likalo ya sika, batiaki yango likolo na likalo ya sika, to, “ebongiseli ya sika elingi kosalema,” kasi likolo na oyo Nzambe abongisáká pe apesáká te, mpo na komema yango. Esengelaki komemama likolo na mapeka ya Balewi. Kasi, bomoni, soki bobandi mabe, bokokoba kaka mabe.

⁸⁵ Soki lisasi esengeli kokende kino na esika bakani kobeta yango, pe yo oningisi bondóki kaka mwa moke awa, mpo na kobanda, na ntaka ya métele mokama okotangwa na yango na pouce minei to mitano [satimétele zomi to zomi na mibale na ndambo—N.D.T.]. Obandi mabe.

⁸⁶ Ee Nzambe, sunga biso mpo toyeba ete likambo oyo ebandi mabe, ba-kampanye minene ya mikolo oyo, ndenge babengaka yango. Bazali koluka toli epai na Nzambe te mpo na yango. Bazali koluka toli nde epai na banganganzambe pe basambeli. Bazali koluka toli epai na bibongiseli. “Boye, okolinga kozua likambo *boye na boye*? Nandimi, soki tokokaki mpenza kosangisa bato nyonso!” Bosangisa bato nyonso te. Bozua nde oyo Liloba na Nzambe elobi mpo na yango.

⁸⁷ Na bongo tomoni ete, ntango basalaka bongo, basalaka nini? Bakobaka kaka kokende liboso elongo na manaka na bango ya kala, oyo ezali libanda na Liloba na Nzambe pe na mokano na Nzambe. Eloko yango esílá kokufa, eleki mibu ebele, biloko oyo ekaúká kala eleki mibu ebele.

⁸⁸ Esílá kokauka na eleko ya Nkolo Yesu. Bayebaki yango te. Alobaki: “Soki bóyébaka Mose, bolingaki pe koyeba Ngai, mpamba te Mose alobaki ete Ngai nakoya.”

Balobaki: “Batata na biso baliaki mána kati na biliki.”

⁸⁹ Alobaki: “Bango nyonso bakúfá!” “Bakúfi miso,” Azalaki kobenga bango bongo, Bafalisai, bakambi ya ba-losambo. “Soko bokondima te ete Ngai nde Ye, bokokufa na masumu na bino.” Kasi bandimaki te. Bakangamaki mingi na banzela na bango. Basengelaki kosala yango na ndenge na bango.

⁹⁰ Dawidi asalaki nde bongo. Asalaki yango na ndenge na ye, na bongo alobaki: “Boyebi likambo nakosala? Tozali kokende liboso.” Azalaki na emoniseli. “Tozali kokende liboso sikawa, na bongo tokosala yango na ndenge ya sika. Ntango ya bikamwa esílá koleka, na bongo tokosala ebongiseli na biso mosusu. Tokosala likalo ya sika, mpo na kotalisa ete eloko ya sika ebandi.” Oyo nde esakweli ya lokuta!

⁹¹ Esengeli ete bozongela kosala ndenge Nzambe alobaki. Bazaláká kotia yango likolo na mapeka ya Balewi, pe ezalaki likolo na motema. Sanduku, Liloba, esengeli komemama likolo na ebongiseli ya sika te, likolo na makanisi ya moto moko boye te, kasi kati na motema. Liloba na Nzambe esengeli kosimbama na bibongiseli te; Esengeli kosimbama nde na motema ya moto, epai Nzambe akoki kokota mpo ete Amimonisa. Pe soki amonisi yango kokokana na Liloba, ezali Nzambe; soki bongo te, ezali Ye te.

Pe, lisusu, ézala Liloba ya ntango wana! Solo, Mofalisai moko akokaki koloba: “Nani alobaki na biso ete tokoki te kosala *boye* pe kosala *boye*? Mose moto apesaki biso mitindo oyo.”

“Kasi Mose pe alobaki . . .”

Satana alobaki: “Ee, ekomami: ‘Akopesa baoyo ya Ye Banj- . . .’”

⁹² “Ekomami pe lisusu,” elobaki Yesu.

Eleko, ntango! “Soki boyebaka Mose! Moto moko azali kofunda bino, ezali Mose. Soki boyebaka Mose, bolingaki pe koyeba Ngai,” Alobaki, “mpamba te Mose akomaki na ntina na Ngai. ‘Yawé Nzambe na bino akotemisa Mosakoli moko kati na bino, longwa na bandeko na bino; bakoyoka nde Ye.’” Soki Bayebaka Mose, balingaki pe koyeba Ye.

⁹³ Sikawa na bokebi, boyoka, bozanga likambo oyo te sikawa. Bomoni, likambo ya liboso, ntango balukaki toli epai na banganganzambe, balukaki toli epai na bato na lokumu, balukaki toli epai na mapinga, balukaki toli epai na ba-losambo nyonso, epai na bato ya nzinga-nzinga, mpo básangana na ntina na mitíngi monene oyo ezalaki koya, basalaki yango malamumu te. Batunaki toli epai na Nzambe te. Pe, lokola basalaki bongo, bazongaki nsima te mpo na koyeba soki ezalaki Ntango nini!

⁹⁴ Oh, ndeko, yoka. Tozali kobika na ntango nini? Ezali eleko nini? Tozali kati na ngonga nini? Ezali ntango ya makambo oyo bazali kolobela te. Oyo wana esilá koleka. Kosambisama ekómi pene sikawa. Bokoki komona ete ebandi kosalema. Bozali komikanisela na libanga wana likolo na ngomba? Ntango ya kosambisama! Bozali komikanisela na emoniseli, to na emononeli ya Mwasi na libala? Bosala ete Atikala kati na etamboli. Botika Ye te ete abima na etamboli.

Botala, “Likolo na mapeka ya banganganzambe!”

⁹⁵ Dawidi ná banganganzambe nyonso, baoyo mpenza basengelaki koyeba likambo yango malamú, kasi ezalaki nini? Banganganzambe basengelaki koyeba likambo yango malamú. Bakomeli, bato na likindo, basengelaki koyeba likambo yango malamú, mpo ete Liloba elobaki ete basala bongo te.

⁹⁶ Pe lelo, ntango bazali kolinga koloba: “Oh, Yesu Klisto azali motindo moko te lobi, lelo, pe libela. Ezali nde botangi makanisi. Ezali *boye* na *boye* to *boye*.” Bazali komona Liloba oyo elakami te. “Oh, oyo wana ezaláká kala.”

Dawidi alobaki: “Oh, boye, sikawa bozela mwa moke. ‘Likolo na mapeka ya—ya banganganzambe,’ oyo wana ezaláká nde ntango Mose abimáká. Solo, biso, lelo tokotia yango likolo na likalo ya sika. Nazui emoniseli na yango.”

⁹⁷ Banganganzambe balobaki: “Amen, Dawidi!” Bomoni, bapusamaki na likita na bango ya sika oyo ya ekimenizme, oyo elobi ete bango nyonso basengeli kozala elongo mpo na kosala likambo oyo *boye* na *boye*, yango nde esalaki ete banganganzambe babeta libaku. Balukaki toli epai na moto oyo alongobani te. Basalaki yango na ndenge elongobani te, yango wana bazuaki mikakatano. Iyo.

⁹⁸ Ezali kosala ngai mpasi, komona ete kati na makambo mingi lelo. . . Ntango molakisi moko monene, moko kati na bato minene ya ba-Pantekotiste, atelemaki liboso na etonga ya basambeli mokolo wana na mpokwa, na Chicago. Esengelaki ete názala na liyangani yango elongo na Bato na Mombongo; kasi likanisi eyelaki ngai ete nalingaki kozala na Afrika na ntango yango, kasi nazongaki kaka mokolo moko liboso ete yango ébanda. Pe baponaki moto moko ya maye mingi ya ba-Pantekotiste, amataki pe ayebisaki bango ete lisanga wana ya ekimenizme ezali eloko ya Nzambe. Pe alobaki ete bango nyonso bakozonga, ete ata lingomba Katoliko ekozonga na lolenge na yango ya ebandeli, ete bango nyonso bakobanda koloba minoko na sika lokola elembo, pe bongo na bongo. Kozanga koyeba ete yango ezali motámbo ya zaboló!

⁹⁹ Pe mobali moko oyo nayebaki te. . . Mbala mosusu oloni mimboto; oyebi te likambo nini ekosalema. Kasi mokonzi ya Bato na Mombongo ya Litondi ya Nsango Malamú, kaka ntango molobi monene wana afandaki, alobaki: “Natindami koloba

makambo mpo na kotelemela balobi na biso te, kasi Ndeko Branham alobaki te ete ekosalema ndenge wana. Kasi alobaki ete yango ekomema bato na elembo na nyama.”

Alobaki: “Kasi Ndeko Branham ayebi likambo oyo azali koloba te.”

Alobaki: “Biso tozali . . . tondimi ete ayebi.” Bomoni?

¹⁰⁰ Pe na Chicago, nalobaki: “Bato boni bazali awa oyo bakolinga ete ngai naya koloba ndenge ngai namonaka likolo na yango?” Bato babandaki koganga pe kosepela.

Bomoni, ozali kolona mimboto; oyebi te likambo nini ekosalema. Koba kaka kotia Momboto. Soki ntango na yango ekoki, bamosusu kati na bango . . .

¹⁰¹ Lokola Tomá, azalaki penepene moto ya suka mpo na komona Nkolo. Kasi, asengelaki komona Ye, mpo ete andimela Ye. Bomoni, ntango bazali komona yango kokokisama. Oh, Tomá akómaki wana, kasi ayaki mwa moke na nsima.

¹⁰² Sikawa ntango bazali komona makambo oyo elobamaki liboso, na nzela na YANGO ELOBI NKOLO, ete ezali kokokisama, na bongo bakoloba: “Bopesa biso ndambo na mafuta na bino.” Bomoni?

¹⁰³ Kasi sikawa botala, kopusama. Mbala mosusu bato minene bayanganaka. Okoyoka bango koloba: “Moto monene *Songolo*, ná moto monene *Pakala*, moto monene na biso . . .” Bosalaka bongo soko moke te.

Bato minene bazali te kati na biso. Moto monene azali bobele moko, ezali nde Nzambe. Bisu tozali bandeko mibali, bandeko basi. Ata soki ozali mokengeli ya lingomba oyo ezali na bato mitano, yango ekokómisa yo moke te; yango ekokómisa yo ndeko, bomoni, soki ozali sembo na Liloba na Nzambe. Bókipaka soko nini te, to lolenge moko boye te; okómi moke te. Nzambe azali na bana ya mike ná bana ya mikólo te. Azali kaka na bana. Bango nyonso bazali ndenge moko.

¹⁰⁴ Botala, Nzambe Ye moko atikaki bandako ya Nkembo ya mpembe ya nzoku, mpo na kokóma moko na biso. Sikawa nani azali moto monene? Azuaki . . . Akitaki awa mpo na kozua lolenge ya nganzambe te, kasi ya moómbo. Asukolaki potopoto mpenza oyo Ye moko akelaki, makolo ya bantoma na Ye ná bato mosusu. Sikawa nani azali moto monene?

¹⁰⁵ Bato yango bapusamaki. Basosolaki te. Bakanisaki ete eloko moko ya sika elingaki kosalema, te, eloko moko oyo Nzambe alobaki te ete ekosalema. Basalaki yango na ndenge ya mabe.

Yango nde ntina ya esengo nyonso oyo, ntango . . . ebandá kala, eleki ntango molai, ebongiseli moko na moko esengelaki kozala na mobikisi-babeli mpo na Nzambe; ebongiseli moko na moko esengelaki kozala na *oyo*, *oyo kuna*, to *oyo mosusu*. Ebongiseli moko na moko esengelaki kozala na mwa Dawidi na

bango. Moko na moko esengelaki kozala na *oyo*, *oyo kuna*, to *oyo mosusu*. Bomoni likambo oyo esalemaki? Esalaki kaka likambo oyo ezali kosala awa. Ndenge moko. Kopusama!

¹⁰⁶ Liloba mpo na eleko wana, ntango oyo bazalaki kobika kati na yango, babosanaki yango.

¹⁰⁷ Botala, “mapeka ya Balewi,” nde ezalaki nzela ya ebandeli oyo Nzambe abongisaki mpo na kosala makambo yango. “Bomema sanduku yango na mapeka ya Balewi.” Nyonso oyo ezalaki libanda ekesanaki na yango. Oyo Alobaki, yango nde oyo Alingaki koloba. Nzambe akoki kobongwana te. Yango wana, bokangama na Liloba na Ye! Nazali na Makomi, iyo, Ntango ya Liboso 15:15, soki bolingi kokoma yango. Botala.

¹⁰⁸ Sikawa botala, kuna, mpo na kolanda Nzambe. Sikawa nalingi ete bosimba likambo oyo na makanisi na bino. Mpo na kotosa mibeko ya Nzambe, mpo na kosalela Nzambe likambo soko nini na ndenge elongobani, mpo na kosalela—kosalela Nzambe mosala na ndenge elongobani, mitindo ezali mitano, mpo na kosalela Nzambe mosala na ndenge elongobani.

¹⁰⁹ Bongo Dawidi azalaki kosalela Nzambe mosala. Azalaki kosala nyonso oyo akokaki kosala, bobele ete abosanaki Nzambe. Bomoni? Azalaki kosala likambo moko oyo ezalaki malamumu, likambo moko ya malamumu mpo na libota, likambo moko ya malamumu mpo na lingomba.

¹¹⁰ Kasi mitindo ezali mitano. Nalingi ete bobosana likambo oyo te. Ata soki moto azali sembo ndenge nini ntango azali kosala yango, kosalela Nzambe mosala, oyo, esengeli ete mitindo mitano oyo ékoka.

Ya liboso, esengeli kozala ntango na Ye mpo na kosala likambo yango.

¹¹¹ Bongo soki—soki Mose áyáka koloba: “Tokotonga masuwa mpo na kosala mobembo na ebale ya Nile, lokola Noa”? Ntango ya Noa elongobanaki mpo na masuwa, kasi ntango na ye te.

¹¹² Nini elingaki kosalema soki Yesu áyáka koloba: “Sikawa Nakoyebisa bino eloko tokosala. Tokomata kuna na ngomba, lokola Mose, mpo na kozua maloba ya sika ya mibeko”? Bomoni? Te-te! Ye nde azalaki mobeko yango. Bomoni?

¹¹³ Bosengeli kozala na ntango na Ye. Esengeli kozala na eleko na Ye. Bososoli yango sikawa? Esengeli kozala na ntango na Ye. Esengeli kozala na eleko na Ye, ntango pe eleko.

¹¹⁴ Esengeli pe kozala yengebene na Liloba na Ye oyo elobami. Esengeli. Ata soki bolobi ete likambo *boye* esengelaki kozala, to likambo *wana* esengelaki kozala, to likambo *boye* esengelaki kozala, etali ngai te. Esengeli kozala yengebene na Liloba na Ye; yengebene na ntango na Ye pe na eleko na Ye.

Esengeli pe kopesama yengebene, na moto oyo Ye aponi mpo na kosala yango.

115 Motango na bato ya lokumu etali ngai te. Mokonzi Dawidi azali wana, azalaki pe moto monene lokola bango nyonso. Azalaki mokonzi ya ekólo. Kasi Nzambe azalaki na lolenge ya kosala yango, pe Ayebisáká bango ndenge Alingaki kosala yango. Kasi basalaki yango te.

116 Esengeli kozala yengebene na Liloba na Ye; yengebene na ntango na Ye, yengebene na mwango na Ye.

117 Esengeli pe kosalema na nzela na moto oyo Aponi mpo na kopesa yango pe mpo na kosala yango. Mose amekaki kokima yango: “Kamata moto mosusu.” Kasi Nzambe aponaki nde Mose mpo na kosala yango. Mingi kati na bango; Polo amekaki kokima yango; bato mosusu ebele. Kasi esengeli kosalema na moto oyo Ye aponi mpo na kosala yango.

Esengeli pe koya, liboso, epai na basakoli na Ye. Liloba na Nzambe esengeli koya epai na basakoli na Ye. Aмоса 3:7: “Nkolo Yawe akosala likambo te liboso ete Ayebisa Yango epai na moómbo na Ye mosakoli.” Minei.

118 Pe esengeli ete mosakoli atitolama na Liloba na Nzambe.

119 Mitindo mitano oyo bosengeli kolanda yango wana. Esengeli kozala bongo. Ntango na Ye, eleko na Ye, na ngonga oyo Alobaki ete yango ekosalema; pe moto oyo Ye aponá; esengeli koya epai na mosakoli; pe mosakoli yango asengeli kozala mosakoli oyo atitolami. Tomoni yango, mingi kati na Biblia, eyaki epai na basakoli, kasi etatolamaki te. Mosakoli na biso ezali Yesu Klisto.

120 Bongo sikawa botala, bomoni, Nzambe amonisáká bango likambo yango te na lolenge oyo Abongísá mpo na kosala yango. Bandimáká lolenge ya Dawidi. Bandimáká lolenge ya banganzambe. Bandimáká lolenge ya bakomeli, ya bato na likindo, kasi lolenge ya Nzambe te. Natana-ele, ye nde, azalaki mosakoli ya eleko wana. Na nsima, Natana-ele ayebisaki bango ndenge ya kosala yango. Kasi, bomoni, bango basalaki yango kozanga koluka toli epai na Natana-ele. Elobami ata moke te ete balukaki toli epai na Natana-ele. Kopusama nyonso, likambo monene oyo esalemaki! Pe, oh! la la! nakanisi loyembo wana, “Tika, batela . . .”

Sunga ngai, Nkolo, wana mitema ezali kopela,
Nákitisa lolendo na ngai (mpo nátambola
elongo na bamosusu), nábenga bobele
Nkombo na Yo;
Lakisa ngai ete nátiaka motema na oyo
bamosusu bazali kosala te,
Názelaka bobele na libondeli eyano kouta na
Yo.

Bomoni, ezalaka nde bongo. Námona yango kosalema na ndenge elongobani, bongo ekondimama.

¹²¹ Boye, Nzambe amonisaki bango likambo yango na nzela na Dawidi, na nzela na batei, na nzela na libota, na nzela na mikóló na nkoto, pe na nzela na mikóló na nkama, kasi na nzela na Natana-ele te, oyo azalaki na YANGO ELOBI YAWE. Nzoka nde Yawe alobaki ete Akosala eloko moko te soki naino Amonisi yango te epai na mosakoli ya eleko wana, liboso, oyo esengeli kosalema. Bomoni oyo basalaki? Babimaki mpenza libanda na Liloba na Nzambe, bakendeki pe batiaki sanduku likolo na likalo ya sika. Bomoni? Boye basalaki yango kozanga kotala mitindo ya Nzambe pe lolenge oyo Nzambe abongísá.

Pe yango nde ezali kosalema lelo, baninga. Yango wana tosali mayangani minene ebele ya kopalanganisa Nsango Malamu, pe bongo na bongo, kasi mbano ata moko te. Ekobo ebakisami, masumu ebakisami, kobakisama ya . . . Nazali koyebisa bino, ekólo oyo ebebi; kaka ekólo oyo te, kasi bikólo mosusu pe. Ekólo oyo, lokola Angletere ya kala, ezali nde mwasi-ndumba, na kati ya bikólo mosusu nyonso.

¹²² Kuna na Mozambique, na ntaka ya mile nkama minei na ntuku mwambe [kilométele nkama nsambo na ntuku nsambo—N.D.T.] mosika na sivilizasió, kati na zamba, bana mike ya beatnik bayokaka mizíki ya Elvis Presley, koningisa motó pe kopimbwa-pimbwa ndenge wana, butú mobimba, ná ba . . . To, na mwa ba-radio ndenge wana, bakendaka na ntaka ya mile nkoto [kilométele nkoto moko na nkama motoba], kino na Rodezí, mpo na koyoka mongongo ya Elvis Presley. Lisusu balobaka: “Azali mosambeli monene, ye ná Pat Boone, pe bamosusu.” Ee, azali nde Yudasí ya mikolo oyo, kasi bayebi yango te. Yango nde ngámbo ya mabe, bazali kokanisa ete ba—bazali na elonga.

Yesu alobaki na Eleko ya Lingomba ya Laodikia oyo te ete, “Ozali moto na bolumbu, na makambo na mawa, na bolozí, na miso makufi, pe oyebi yango te”? Oyebi yango te!

¹²³ Ee, bilenge ba-Pantekotiste kuna na Afrika pe bipai mosusu, balobaka: “Ee, Elvis Presley, ayembaka kitoko koleka bato nyonso.” Naboi te kasi Dawidi asaláká pe bongo; naboi te kasi bayembi wana basaláká pe bongo, kasi yango nde esalaki ete kufa ébéta moláko. Bomoni esika bakómi, esika tokómi, baninga?

¹²⁴ “Mapeka ya Balewi,” ezalaki lolenge ya ebandeli oyo Nzambe abongisaki mpo na kosala yango. Kasi bango batiaki yango likolo na likalo ya sika. Pe, ekotambola ata moke te. Balukaki toli na ndenge elongobani te. Bomoni? Boye babimaki libanda, na oyo etali likambo oyo, pe basalaki yango na lolenge ya mabe.

¹²⁵ Pe yango nde esalemi lelo. Ntango bato, ata soki bazali sembo ndenge nini, bameki kosalela Ye mosala libanda na lolenge oyo Ye abongísá mpo na komonisa yango, babebisaka makambo ntango nyonso. Nzambe asalaka yango na lolenge oyo ya Ye.

Bato, ata soki bozali sembo ndenge nini, soki bomeki kosala mosala libanda na yango, bo—bokobebisa makambo.

¹²⁶ Ezali lokola Balame, na ntango na Balame. Nzambe alobelaki Balame, mosakoli wana. Azalaki mosakoli, mosakoli Balame. Azalaki mosakoli, pe Liloba eyaki mpenza epai na ye, elobaki: “Kokende kuna te. Ezali baoyo Ngai naponi. Ezali kopona na Ngai.”

Bongo Balame akutanaki na bato ya lokumu, mapinga, batei, bato oyo bayebani, pe alobaki: “Ee, bo—boyoka, mokonzi ako . . .”

Bomoni, kaka likambo oyo ekomelaki Dawidi, ezali kosalema lelo. Bózuaka makambo nyonso na bitaliseli, pe bokomona yango. Bomoni yango? Boloba: “Amen.” [Losambo balobi: “Amen.”—N.D.E.] Bomoni? Bomoni, kaka ndenge ekómi sikawa.

¹²⁷ Kasi bakonzi ya lingomba balobaki, ba—ba—banganganzambe balobaki, bakomeli balobaki, bato na likindo balobaki: “Esengeli kosalema nde *boye*.” Kasi, ezalaki bongo te, pe etalisamaki polele ete ezalaki bongo te.

¹²⁸ Bongo Nzambe alobaki na Balame, azalaki pe mosakoli, liboso, Alobaki na ye: “Kokende te.”

¹²⁹ Kasi kopusama ya bato mosusu wana ememaki ye ete asala yango kokesana na oyo Nzambe alobaki ete asala, pe ekómaki elakeli mabe na esika ya kolamuka. Oh, solo, akendeki kuna pe ateyaki libota, alobaki: “Sikawa bozela! Boyebi?” Alobaki: “Tozali—tozali Bamoaba. Bomikanisela, mwana—mwasi ya Lota nde mwasi—mokonzi na biso. Ye nde nkoko na biso ya ebandeli. Bisó nyonso touti na makila se moko. Bisó nyonso tozali . . . Bibongiseli na biso nyonso ezali ndenge moko.” Bomeka kosangana na likambo wana te. Botikala mosika na yango. Bomoni? Bongo alobaki: “Bisó nyonso tozali kaka ndenge moko. Ee, libota na bino ezali lokola libota na ngai. Tokoki kobalana, bamoko na bamosusu, boye tokoki kosala likita ya solosolo ya ekimenizme. Bomoni? Bisó nyonso tokoki kosangana pe kozonga na eloko oyo ya ebandeli.”

Nzambe alakelaki eloko yango mabe. Lisumu wana elimbisamelaki Yisalaele ata moke te. Ekangamaki na bango na mikolo na bango oyo etikalaki. Elimbisamaki ata moke te. Bakufaki na yango kati na biliki. Ya solo. Mpo ete balandaki te lolenge oyo Nzambe abongisaki pe nzela oyo Atatolaki mpo na kosala yango.

¹³⁰ Botala, likambo oyo basalaki ememaki Yisalaele na kufa, kati na biliki. Pe Yesu alobaki: “Bango nyonso babomamaki pe bakufaki.” Botala banani batikalaki elongo na Mose kuna, Yosua ná Kalebe, kati na—kati na mwango yango.

¹³¹ Botala lisusu, Dawidi ye oyo, likambo oyo asalaki. Ntango asalaki bongo, esalaki nini? Esalaki ete kufa ébéta moto oyo azalaki sembo.

Sikawa, nabanzi ete tozali naino koyokama na nzela ya nsinga, pe nalingi ete boyoka yango kati na ekólo mobimba.

Likambo oyo Dawidi asalaki, kozanga koluka toli epai na Natana-ele mpo na kozua Liloba na Yawe na ntina na yango, esalaki ete kufa ébéta bato oyo bazalaki sembo. Iyo, misie. Asembolaki loboko, ye moto azaláká kobika liboso na sanduku yango; eutaki kobima na—na ndako na ye. Ngombe ebetaki libaku, pe sanduku elingaki kokwea.

¹³² Basilaki kosala libunga moko, mabunga mibale. Ya liboso, balukaki toli epai na Natana-ele te. Likambo mosusu oyo basalaki, bakendeki kuna kozanga ete baluka koyeba oyo Liloba na Nzambe elobi. Elingi koloba . . . Samuele moto azalaki Liloba na ntango wana . . . Alukaki pe koyeba oyo Liloba na Yawe elobaki te. Na bongo, ntango basalaki bongo, basalaki oyo ekesani na Liloba na Nzambe.

Pe awa moto malamau oyo, oyo azaláká kobatela yango, azaláká eveke, amilobelaki: “Ee, awa, nalingi te ete bakweisa Nzambe,” asimbaki bongo sanduku. Nzoka nde, azalaki Molewi te, pe akufaki. Makambo misato!

¹³³ Sikawa bokanisa malamau, pe botala malamau oyo bibongiseli basali lelo. Bomoni, baboi Yango, babengi Yango “malakisi ya lokuta.” Bomoni? Botala epai bakómi. Bakozua likita na bango ya ekimenizime, ya solo. Babengi Yango “botangi makanisi,” na ntango oyo Nzambe Ye moko azali kotatola Yango ete ezali Solo, pe azali kotalisa polele ete Ezali Solo. “Oh, baoyo wana bazali bobele mwa bazoba moko boye,” ndenge balobaka, “bayebi makambo oyo bazali koloba te.”

Ya solo, toyebi te. Kasi tolobaka bobele Maloba na Ye, pe Ye moto ayebi oyo Azali koloba, bomoni. Nakoki kolimbola Yango te, moto mosusu pe akoki te, kasi Ye—Ye—Ye azali kotalisa Yango polele.

¹³⁴ Sikawa botala. Bandimi mingi ya sembo lelo, oyo bayei epai na Klisto, balingi koya na motema mobimba, bazali kobomama na ndenge ya molimo kaka boye. Bato mingi ya sembo bakendaka na lingomba Katoliko pe balingaka kokóma Baklisto, bakendaka epai ya ba-Metodiste, ba-Batiste, na eglise de Christ, ata pe epai ya ba-Pantekotiste, bomoni, pe balingaka kokóma Baklisto, basimbaka yango, basanganaka na bango.

¹³⁵ Pe ntango Dawidi amonaki likambo wana kosalema, elamusaki ye. Kolamuka te ntango ngonga ekosila koleka, ndeko na ngai oyo ozali kuna. Amonaki ete kufa eutaki kobeta.

Bolakisa ngai mbano na yango. Kolamuka oyo ya maloba, oyo ezali kozongisa bato na mangomba, esali nini na ekólo

oyo, na—na etonga ya bandimi? Eloko moko te bobele kosala bibongiseli pe mangomba ya sika, na ntango nyonso oyo, kobakisa bandimi pe bongo na bongo. Ekólo ebongi? Balobaki ete balingaki ko . . .

¹³⁶ “Amerika. Nzambe apambola Amerika. Ezali—ezali ekólo, ezali mboka ya Baklisto.”

Ezali mosika mpenza liboso ya kokóma mboka ya Baklisto. Nabondelaka ata mpo na yango te. Ndenge nini nakoki kobondela mpo na yango, wana ezali koboya kobongola motema liboso na nguya monene ya Nzambe oyo etalisami na miso na yango; wana ezali koboya, kokangela Yango ekuke, pe kotangwa? Napesaka yango epai na Nzambe. Azali kaka kokoba kotangwa. Pe sikawa etikali moke ete azinda. Botala kaka oyo ekosalema.

¹³⁷ Bato mingi ya sembo bakendaka kokota na bibongiseli, to na bitonga, to na balosambo moko boye, pe kuna, bazali kokufa, na molimo. Okoki koloba na bango ata likambo moko te. Makambo wana efanda mpenza kati na bango: “Ee, ba-eveke oyo balobaki *boye*. Pe *oyo* alobaki boye, *oyo* alobaki boye.” Okolakisa bango awa kati na Liloba na Nzambe esika YANGO ELOBI NKOLO ezali. “Kasi mokengeli na biso . . .”

Oyo mokengeli na bino alobi etali ngai te, botalaka oyo ngai nalobaka te, to oyo moto mosusu alobaka te. Soki ekesani na Liloba na Nzambe oyo etatolami, ngonga, ntango, Nsango, pe bongo na bongo, bobosana yango. Bozala mosika na yango. Nakosengela kotelema liboso na moko na moko na bino na Mokolo na Kosambisama, pe boyebi yango. Pe nazali koloba yango mpamba te, koyeba ete nakómi mobange sikawa. Nako . . . Elingi koloba te ete ngai nde nayebi, kasi Ye ayebi. Nalandaka bobele oyo Ye alobaki.

¹³⁸ Botala lelo oyo mayangani minene ya kopalanganisa Nsango Malamu oyo tosali na ekólo mobimba. Emonani polele ete esalemi mpamba. Pe Yesu alobaki te, awa na Luka 7:7: “Bakosanzolaka Ngai mpamba”? Dawidi abengisaki sanduku mpamba. Akaba alakisaki basakoli wana mpamba. Balame azuaki mbongo wana mpamba. “Bakolakisaka Malako mazali mibeko na bato.” Mibeko na Nzambe nde ezali na motuya, ata soki bosemb- . . .

¹³⁹ “Bato yango bazali mpenza na bosembo.” Boyokaka bato mingi balobaka: “Bazali mpenza na bosembo.” Wana ezali ata na ntina moko te. Ba-Témoin de Jéhovah, ba-Adventiste du Septième Jour, pe ba-losambo nyonso wana, batambolaka na babalabala pe basalaka makambo oyo moto ata moko te kati na biso akolinga kosala. Bakatoliko batelemaka na matákanelo ya babalabala mpo na kosenga makabo, pe bongo na bongo, na mitindo ya bonganga na yango ndenge wana, pe bazali na bakiasa na kiasa na kiasa ya ba-dollar, kasi bazali kaka kosenga. Bazali sembo, na ntembe te. Mangomba ezali kokende mpo—

mpo na koteya, pe bongo na bongo, pe batei bazali kotelema na biteyelo pe kosala nyonso oyo bakoki kosala mpo na kozua bandimi ya sika na mangomba na bango; kasi ezali sanduku ya sika.

Sanduku ya kolanda ezali bobele moko, ezali nde Liloba na Nzambe. Nyonso oyo ekesani na Sanduku yango, botikala mosika na yango! Ezali likolo na likalo ya sika, kasi likolo na mapeka ya Nzambe te. Ya solo. Botikala mosika na likambo yango. Bokota na likambo yango te.

¹⁴⁰ Mayangani na biso minene ya kopalanganisa Nsango Malamu, bakiasa pe bamilió ya bato basili koyambola masumu. Kasi nandimi te ete mokama kati na bango bakotikala, kati na bato nyonso wana. Bomoni, ezali ata na ntina moko te.

Na bongo botalaka nde Liloba na elaka.

¹⁴¹ Okokanisa ete yango elóngí te, pe toyebi ete elóngí te. Bato na biso mosusu ya—ya kolamuka, oyo baleki monene kati na mboka lelo, bazali koloba ete elóngí te na mobimba. Lingomba eyebi ete elóngí te. Moto nyonso ayebi ete elóngí te. Ee, mpo na nini boye? Mpo na nini elóngí te?

Ezalaki mpo na ntina malamumu. Ezalaki mpo na komema bato Liboso na Nzambe, ba-kampánie minene yango. Bamilió ya bato babebisaki mbongo na bango, pe bakotisaki yango na ba-kampánie minene. Mangomba nyonso esanganaki, biyanganelo minene, makambo minene, pe makambo minene esalemaki. Mpo na nini elóngaki te? Ezali mpo ete bayebaki ntango oyo bazalaki kobika kati na yango ata moke te.

Kokamwa te ndenge Yesu atelemaki, pe kati na motema na Ye, Alelaki. Mpisoli etangaki na matama na Ye, pe Alobaki: “Yelusaleme, E Yelusaleme, mbala boni Nalingaki koyanganisa bino lokola nsoso akoyanganisa bana na ye. Bozali kobwaka mabanga epai na basakoli nyonso oyo Natindelaki bino. Kasi bolingaki te. Kasi sikawa ntango na bino ekoki.”

¹⁴² Bozali koyoka te ndenge Molimo Mosantu azali koganga kati na bino? “Oh, Etats-Unis pe mokili mobimba, mbala boni nalingaki koyanganisa bino, kasi bolingaki te. Sikawa ntango na bino ekoki. Nzambe na bino ya bisengo, nzambe na bino ya mbindo, nzambe na bino ya Sodoma ná Gomora, akoti kati na bino.” Ata bana na biso ya mike, bakómi kokata suki lokola ba-beatle, ná suki kokita likolo na bilongi na bango, pe bazali mwa bato ya nkanza oyo bazali kobanda. Basi na biso babebi. Bakatisi ndelo ya lisiko. Mibali na biso bakómi lokola basi, kotambola na mwa bapataló ya mikuse, kosala makambo lokola bana basi, pe suki na bango ezali kokwea kino na nkingo. Pe tokómi bato na Sodoma, móto pe nkanda na Nzambe ezali kozela biso.

¹⁴³ Boyebi ndenge nini Akoboma, ndenge nini Akobebisa yango? Kaka ndenge Asalaka ntango nyonso. Ntango mwasi na ndumba azalaki kosala mbeba, bazalaki kobamba ya mabanga kino

ete ákúfa; bazalaki kolokota mabanga mpo na koboma mwasi oyo azalaki mwasi ndumba. Akoboma lingomba nde bongo. Biblia elobi ete Akonokisa mbula ya matandala minene uta na likolo, oyo moko ekozala na bozito ya livre mokama [kiló ntuku minei na mitano—N.D.T.], pe Akoboma bango na mabanga. Nani akopekisa Ye? Zebi nini ekoloba ete ekoki kosalema te? Akosala yango.

Kaka ndenge Asalaki masuwa pe Abikisaki Noa likolo na mai, Akosala yango lisusu mpo na Lingomba na Ye.

Pe na nzela na mibeko na Ye Moko pe na ndenge na Ye Moko, Akoboma mwasi ndumba wana na mabanga, mwasi oyo asali ekobo ná mikonzi, mikóló na nkama pe mikóló na nkoto. Akobamba ye mabanga kino ete ákúfa, yengebene na mibeko na Ye Moko, oyo Asilá kobongisa. Nani akolobela Ye ete Akoki kosala matandala minene te?

¹⁴⁴ Botuna moto oyo ayebi ndenge litanga ya mbula ebandaka. Esalaka libúngútulú, bongo ekótaka na lidusú moko; ekokóma monene moke-moke, kino ekokóma na bozito moko boye, na nsima nde ekokwea.

Ye, Nzambe, Oyo. . . pesanteur ekokaki ata kokanga Ye na mabelé te, pe Amataki kino na Likolo. Nzambe, Oyo asálá pesanteur, akoki pe kosala lidusú ya monene mpo na kokoka kolekisa libanga kino ete ékóma na bozito ya livre mokama [kiló ntuku minei na mitano—N.D.T.]. Alobaki ete Akosala yango, pe Akosala yango. Nani akolobela Ye ete Asala yango te? Akosala yango, mpo ete Alobaki ete Akosala yango.

¹⁴⁵ Tokómi na ntango ya suka. Tokómi pene na kosambisama. Mpo na nini? Bazali komeka kolia mána ya kala, oyo ekwéyá kala, eleki mibu ntuku mitano, mpo na lingomba ya ba-Pantekotiste. Eglise de la Sainteté ezali komeka kolia oyo ekwéyá eleki mibu nkama mibale. Ba-Lutherien, eleki pene na mibu nkama misato, to koleka, eleki mibu nkama ebele. Bazali komeka kolia mána ya kala. Oh, ndeko, eloko wana eninganaka lisusu te. Esilá kobeba. Eko. . . Ekótá—ekótá. . . Ee, ndenge nalobaka ntango nyonso, ekótá mitshópi, nkusú. Ekoboma bino, soki bolei yango.

¹⁴⁶ Botala: soki Dawidi to moto moko kati na bango akokaki bobele koluka toli epai na Lipa ya eleko wana.

Soki banganganzambe, basakoli, batei, bato na likindo, biteyelo, pe bibongiseli, bakokaki bobele koluka toli ya ntango oyo! Kasi sikawa ekosala bango bolamu moko te. Esilá koleka. Ekosunga ata moke te. Esili mpo na ye, sikawa. Asilá kokatisa ndelo yango eleki penepene mibu mitano, ndelo kati na kobongola motema, kosambisama pe ngolu.

¹⁴⁷ Botala, boye likambo nini? Tósala nini? Tosengeli kosala nini? Tóluka toli epai na mosakoli, Biblia, oyo tokoki kobakisa

to kolongola uta na Yango te. Soki tosali bongo, Nzambe akolongola biso na Buku na Bomoi.

Biblia elobi, na Malaki 4, makambo oyo elingaki kosalema na ntango oyo. Emoniseli 10, ndenge Bilembo Nsambo elingaki kofungwama pe komonisa mabombami nyonso oyo ebombamaki na ntango ya babongisi wana! Alobaki ndenge elingaki kosalema. Ezali kati na Biblia, YANGO ELOBI NKOLO. Nzambe atalisi yango mobimba, na ndenge ebongi be; pe Atatoli Yango ete ezali Solo, na nzela na bilembo, bikamwa na likolo, na mapata, pe nyonso mosusu, kati na mibu ntuku misato na misato.

Bokanisi ete bakoyoka Yango? Te. Basílá kokufa. Bakotisi maboko na eloko moko oyo ebomi likambo yango mobimba. Te, ekosalema te; ekosalema te, ekosalema lisusu ata moke te.

¹⁴⁸ Ezali ntango likambo yango esalemaki, nde Dawidi asosolaki. E Nzambe, tindela biso Dawidi moko, oyo akoki koyeba esika ateleme, oyo akoki kotala malamumu pe komona ete Nzambe moto apesaki elaka, nini, ndenge nini Akosala yango lelo. Nzambe moto alobaki yango awa kati na Liloba na Ye, ndenge nini Akosala yango.

¹⁴⁹ Nzambe moto alobáká na Mikaya. Mikaya atalaki emononeli na ye malamumu liboso na basakoli na lokumu nkama minei. Atalaki emononeli na ye malamumu mpo na koyeba soki elongobanaki. Atalaki na nsima mpo na komona eloko oyo mosakoli oyo azalaki liboso na ye alobaki, mpo na komona eloko oyo esalemaki. Atalaki na nsima, pe amonaki Eliya oyo azalaki wana, alobaki: “Akaba, bambwa bakoleta pe makila na yo.” Na bongo, ayebaki na ntango wana ete emononeli yango elongobanaki mpenza na Liloba na Nzambe, boye alobaki yango. Pe alongaki. Ya solo. Ata soki bamosusu balobaki nini, akangamaki kaka na Liloba wana.

¹⁵⁰ Sikawa totala emononeli oyo tozali na yango lelo. Ezali ya kotonga bandakonzambe; ezali ya makambo ya sika; ezali ya makambo minene oyo elingi kosalema? To, ezali ya kosambisama? Botala na nsima mpo na komona elaka ya lelo, komona eleko oyo tozali kobika kati na yango.

¹⁵¹ Bokoloba: “Ee, Nzambe apambolama, ndeko, nazali sembo. Nakóma kosambela. Nazali licencié en lettre. Nasálá likambo *boye*.” Ezali mabe te, ezali malamumu, naboi yango te; ezalaki ndenge moko mpo na Dawidi, ezalaki ndenge moko mpo na banganganzambe ya ntango wana, ezalaki ndenge moko mpo na bato ya likindo. Kasi ekesanaki na Liloba.

¹⁵² Nzambe alobaki ndenge Akosala yango lelo, ndenge Akozongisa makambo nyonso, oyo Akosala lisusu. Alakaki ete Akozongisa. Ya solo mpenza. Na Yoele 2:28, Alakaki ete Akozongisa. “Nakozongisa,” Yawe alobi ete, “bilanga nyonso oyo likelelele oyo ekopumbwaka esili kolia.” Bazali na bo-...

Bomoni, ezali kaka likelele yango; ezali kati na etape mosusu ya bomoi. Pe ntango bo-Katoliko ebandaki kolia, na nsima ba-Lutherien, ba-Methodiste, ba-Pantekotiste, pe nyonso, baoyo balandaki; Alobaki: “Nakozongisa biloko nyonso na lolenge mpenza ya Lingomba oyo ezalaki na ebandeli.”

¹⁵³ Botala malamumu emononeli ya mokolo wana na mpokwa. Kaka Mwasi na libala oyo ayaki na ngámbo *oyo*, ayaki pe na ngámbo *oyo*. Na nsima basi ya ndumba balekaki ná ba-robe na bango, mwa bilamba na bango mikuse *boye*, bazalaki kobina rock-and-roll, pe komibenga Lingomba.

Bokoloba: “Ee, biso tosalaka bongo te.”

Nzambe amonaka bino nde bongo. Ezali te oyo bino moko bomimonaka. Ezali ndenge Nzambe amonaka bino. Moto moko te amimonaka na libunga. Soki omitali na talatála ya Liloba na Nzambe, Yango nde ekoyebisa yo soki ozali na libunga to te. Soki Dawidi ásálaka bongo, alingaki komona libunga na ye. Soki Akaba ásálaka bongo, to soki basakoli wana básálaka bongo, balingaki komimona na libunga.

¹⁵⁴ Mosakoli moko, oyo atatolami, alobáká: “Akaba akokufa, pe bambwa bakoleta makila na ye.” Pe emononeli na ye elongobanaki na Yango. Na bongo ayebaki ete azalaki na elonga. Ata Yosafata pe asengelaki komona yango pe koyeba yango. Ntango Mikaya amonaki emononeli, ye azalaki komona lolenge moko te na bato ya ntango wana, kasi azalaki na YANGO ELOBI YAWÉ. Azalaki na elonga.

¹⁵⁵ Botala, tomema sikawa likambo yango na ntango oyo, wana tozali komona ntango ya motuya oyo tokómi pene na yango.

Botala pe likambo Dawidi alukaki kosala. Nakomaki mwa makambo awa na ntina na yango. Alukaki ete amema sanduku yango na engumba ya Dawidi, na ebongiseli na ye moko.

¹⁵⁶ Botala na nsima ntango Nkolo alobaki mpo na mbala ya liboso awa na ebale: “Ndenge Yoane Mobatisi atindamaki mpo na kobongisa boyei ya liboso. . . .”

Ndeko, ba-Asamblé bakokaki kóíkela yango mpiko te, ata pe ba-Initéte te, bango nyonso. Bango pe basengelaki kozala na moto moko na esika moko boye. Ah, bango nyonso bakómaki na mposa ya kosala yango, bomoni, ndenge moko mpenza. Bango nyonso bakómaki na mposa ya komema yango na bandako na bango moko.

¹⁵⁷ Balingaki komema yango na engumba na Dawidi. Mpo na nini? Ata esika moko te ebongisamaki mpo na yango.

Pe yango nde ntina okoki koteya Nsango oyo na ebongiseli moko boye te. Liloba, Sanduku, Klisto, “ndenge moko lobi, lelo, pe libela,” ná kotalisama na Ye nyonso, okoki koteya Yango na ebongiseli na bino te. Bakondima Yango ata moke te, mpo ete

esika ezali te mpo na Yango. Biblia elobi te ete Azalaki libanda na lingomba ya Eleko na Laodikia, koluka ete Akota?

Esika ezalaki na engumba na Dawidi te, ata soki ezalaki na bosomebo ndenge nini, na motuya ndenge nini, pe—pe bongo na bongo. Ezalaki kaka esika oyo elongobani te. Esengelaki kozala nde na Yelusaleme. Kuna esika ekendeki na nsima, ntango mosakoli ayebisaki bango eloko basengelaki kosala na yango. Bomoni? Bongo esengelaki ete Dawidi amema yango na engumba na ye moko. Esika moko te ebongisamaki mpo na yango.

¹⁵⁸ Klisto azali Sanduku na biso, pe bakoyamba Yango te. Klisto azali Liloba; bakoyamba Yango te. Balingi bindimeli na bango, bibongiseli na bango, sanduku ya sika, to—to momemi ya sika. Balingi ete ebongiseli emema Yango; sanduku ya sika. Hah!

Bomikanisela, Klisto nde Sanduku na biso! Bondimi ete Klisto azali Liloba? [Losambo balobi: “Amen.”—N.D.E.] Na bongo yango nde Sanduku. Boye te? Malamu. Klisto akoki te komemama, na esika na Ye oyo esengeli, likolo na likalo moko boye ya ebongiseli. Asalaka na moto moko mpamba, kasi na etonga te. Asalá na etonga ata mbala moko te; na moto moko mpamba. Ee, Alobaki ete Akosala yango te. Soki Asali yango, Akotelemela Liloba na Ye, Amosa 3:7. Okoki kosala te ete Ekosa. Te, misie. Ezali Solo.

¹⁵⁹ Kasi, bomoni, bamekaka. Sanduku ekoki komemama na ebongiseli te. Mitó eleki mingi kati na yango. Bomoni? Ekoki kosalema te. Alakaki ete Akosala yango te, pe Akosala yango te. Alobaki . . . ntango Alakaki—ntango Alakaki kosala yango na lolenge mosusu? Yango nde ntina Alakaki ete Akosala yango te.

Bózala na makanisi wana te. Nazali koyoka yango. Bomoni?

¹⁶⁰ Boye A—Alakaki ete Akosala yango na lolenge moko boye, pe nyonso oyo ekesani na yango Akosala yango te. Bomoni? Kasi na lolenge na Ye ya ebandeli, kokokana na oyo Alobaki na Amosa 3:7, Akosala yango nde bongo. Pe yango esengeli kotatolama pe kotalisama polele ete ezali bongo.

Sikawa, boyebi oyo Alakaki mpo na lelo, na bongo Azali kosala yango lelo. Yango mpenza nde oyo Alobaki ete Akosala. Akofungola Bilembo Nsambo wana, pe nyonso oyo Akosala; komonisa mabombami wana, ndenge libatisi pe makambo nyonso ebulunganisamaki mobimba. Pe yango oyo, Liboso na Ye mpenza. Zebi etalisi yango polele. Likolo eyebisi yango polele. Bato bazalaki wana, bazalaki kotala yango boye, pe bamonaki yango kosalema. Alobá ata likambo moko te oyo Azángá kokokisa. Yango nde. Kaka mpo ete bókoka komona esika tokómí lelo oyo.

¹⁶¹ Sikawa, moto nyonso oyo azali na Molimo na Ye, ayebi yango; oyo azali na Molimo na Nzambe likolo na ye, ayebi ete likambo Oyo ezali Solo, mpo ete Molimo na Nzambe ekoki koloba kokesana na Liloba te. Te, te. Ekolongobana na Liloba.

Bokoloba: “Nazali na Molimo Mosantu. Nagángá; nalobá minoko na sika. Nabiná na Molimo.” Ezali na ntina te mpo na Nzambe. Bomoni?

Dawidi pe asaláká bongo, penepene ndenge moko, kuna. Ayembaki na makasi na ye nyonso, pe agangaki na makasi na ye nyonso. Bamosusu pe basalaki bongo, kasi bazalaki mpenza kotambola nde semba na liwa. Ya solo. Yango etali ata likambo yango te.

¹⁶² Liloba nde ezali na motuya, Liloba na Nkolo. “Baoyo batiaka mitema epai na Nkolo.” Iyo, misie. Bomoni, baoyo bazali na Molimo na Nzambe kati na bango, batalaka nde elaka mpo na lelo, basenzelaka pe bazelaka kino ete bamona Yango. Na ntango wana nde bakoloba: “Yango oyo.” Nzambe moto amonisaka Yango epai na bango.

¹⁶³ Nkola Natanaele. Filipino akendeki pe akutanaki na Natanaele. Natanaele alobaki: “Zela naino mwa moke. Nayebi ete likambo yango elakámá, kasi tika ngai namona Yango.” Pe ntango amonaki Yango, alobaki: “Yango oyo.”

Mwasi wana alobaki: “Sikawa, nayebi, nayóká bato na likindo ndenge na ndenge. Nasálá *boye* na *boye*. Natángá pe Biblia, ngai moko, pe nayebi ete to . . . Masiya moko azali koya, oyo akosala makambo oyo, boye Osengeli kozala mosakoli na Ye.”

Alobaki: “Ngai nazali Ye.”

¹⁶⁴ Mwasi yango alobaki: “Yaka komona Moto oyo, ezali Ye.” Azelaki kino ete amonaki Masiya yango kotalisama na nzela na Liloba na Nzambe, na ntango wana nde alobaki: “Yango nde oyo tozelaki, mibu nkama minei. Tozuaki mosakoli to nani te. Ye oyo, pe Ye Moko alobi ete Azali Ye.” [Maloba mazangi na eteni oyo ya bande—N.D.E.] “. . . komona Moto Oyo alobi na ngai makambo masali ngai.”

Kasi banganzambe balingaki koboma Ye, pe sukasuka basalaki yango. Bomoni?

Kasi lelo oyo bakoki koboma Molimo na ye te. Ya solo. Te, bakoki koboma Yango te. Eyaki awa mpo na kokotisa biso, yango wana tozali kozongisa matondi. Botala ndenge Nzambe azali monene, ndenge misala na Ye ezali minene, ndenge ekoki kokwea te!

¹⁶⁵ Bongo, Nzambe azali na lolenge moko ya ebandeli oyo abongisa mpo na kosala makambo, pe Akosala yango ndenge mosusu te.

¹⁶⁶ Bongo Alakaki makambo oyo Akosala na mikolo na suka. Pe Atindi yango, Atindeli biso Nsango oyo; pe Nsango oyo ekozala na kotalisama ndenge moko lokola oyo ya Eliya, lokola oyo ya Elisa, lokola oyo ya Yoane Mobatisi. Pe Ekobongola mitema na bato, epai na ebongiseli te, kasi epai na batata

ya ebandeli, bantoma, epai na Liloba. Boni makambo yango etatolami. Ete koyulama na kelelo ya mwanje na suka, Emoniseli 10: “Na mikolo na mwanje na nsambo, mabombami nyonso oyo ezalaki...”

“Mpo na nini ba-Methodiste basalaki *boye*, pe ba-Batiste, eglise de Christ, ba-Temoin de Jehovah, bango nyonso basalaki *bongo*?”

“Mabombami yango ekomonisama na mikolo na suka, ntango Nsango ya banje nsambo...ya mwanje na nsambo, ntango a...” Ezali kaka ntango akobanda te, kasi, “Ntango akobanda koyula Nsango na ye.” Bomoni? Na mibu ya kolengelama te, kasi, “Ntango akobanda koyula Nsango, na ntango wana nde mabombami yango ekomonisama.” Pe yango oyo; bazali koyeba yango te, pe bino bozali banzeneneke na yango.

¹⁶⁷ Bongo na etalelo monene ya minzoto wana, na ntina ete bamokili bazanga yango, bazali naino komituna likambo nini esalemaki. Na Tucson, bitalelo minene ya minzoto wana ekangaki yango fotó kuna; bazali naino komituna nini esalemaki. Ezali nini? Bazali naino kokoma na zulunále: “Moto moko akoki koyeba likambo moko na ntina na yango, na lolenge oyo yango ekokaki kosalema?” Londendé ezalaka te kuna na likolo, mopepe ezalaka kuna te, ata mwa mai moke ezalaka kuna te; na mosanda ya mile ntuku misato [kilométele ntuku minei na mwambe—N.D.T.] na likolo. Oh! la la!

“Bilembo ekozala kuna na likolo. Pe ntango makambo yango ekosalema, koningana na mokili ekozala na esika na esika, bongo elembo ekomonana na likolo, oyo ya Mwana na moto.” “Na mokolo wana,” na Luka, “Mwana na moto Akomimonisa lisusu; Akozala komimonisa, Ye moko.” Pe mokili ekokóma lokola Sodoma ná Gomora. Oh! la la!

Bandeko, bozanga koyeba makambo ya molimo te, bomoni. “Bolukaluka kati na Makomi, mpo ete na Yango bobanzi Seko, ete bokozua Bomoi na Seko; pe Ezali Yango mpenza etatoli mpo na Liloba.” Ezali Yango mpenza etatoli mpo na Solo, makambo oyo Nzambe azali kosala na ntango oyo.

¹⁶⁸ Bongo likambo nini sikawa? Baoyo bazali na Molimo na Nzambe, bazelaka makambo oyo. Pe ntango bamonaka makambo yango, bandimaka yango. Yesu alobaki: “Moto akoki koya epai na Ngai te bobele soko Tata na Ngai akobenda ye. Pe baoyo nyonso Tata apesi Ngai,” Azali Liloba, “bakoya epai na Ngai. Bakoya epai na Ngai.”

¹⁶⁹ Nateyi mwa makasi mingi na ntongo oyo, bomoni. Batiaka mitema epai na Nkolo, bazelaka; pe na nsima, ntango bamonika elaka mpo na lelo, kotatolama, epesaka bango kondima ya sika kati na Liloba na Ye. Mpamba te, Alakaki ete Akosala yango, pe Ye oyo azali kosala yango. Bongo ntembe ezali te. Nzambe

alobaka. Liloba na Ye elobaka liboso. Pe na nsima Molimo oyo ezali komema Yango ekosala misala oyo Liloba elobi ete Ekosala.

Oh, komekola ezali mingi. Ekokóma lisusu mingi, bato na mitema sembo bazali komeka kosala makambo na lolenge *boye* pe na lolenge *boye*, kasi Botala nini esalemaki. Bato bakosimba, pe na nsima—na nsima bakokufa. Bomoni, botala.

¹⁷⁰ Ata mwango ya bibongiseli ya moto moko te ekotambola, bazali komisalela bandimi mpo na bamasuwa na bango ya bibongiseli oyo basali bango moko. Nzambe asílá naino kozala na ebongiseli ata mokolo moko te. Akozala pe na ebongiseli ata mokolo moko te. Pe ezali eloko oyo moto asali.

¹⁷¹ Pe nazali komituna, lelo, bato nyonso oyo tozali kokotisa pe ba-kampánie ná kolamuka na biso minene-minene, soki tozali te kotondisa masuwa ya ba-Metodiste, masuwa ya ba-Batiste, masuwa ya ba-Presbiterien! Kasi tolobi nini mpo na Masuwa ya Klisto, Liloba?

Bongo soki Mwasi na libala asengeli kozala Liloba, na bongo Asengeli pe kozala ya Klisto, eteni ya Mobali na libala. Asengeli kozala Liloba; Liloba mpo na mokolo na Ye te; Liloba mpo na lelo oyo, oyo Alakaki ete ekozala lelo oyo, na lolenge ete Atindaki Liloba na Ye mpo na kopesa Mwasi na Ye ya libala lolenge pe kobongisa Ye. Nabanzi ete tozali kososola yango! Sikawa kokamata likanisi moko boye ya yo moko te, pe kokamata likanisi ya moto mosusu te. Kamata nde Liloba oyo etatolami oyo, Biblia. Elobi bongo.

Nzambe alakaki kati na Liloba na Ye ndenge nini Akopona Mwasi na Ye ya libala na ntango na suka oyo. Boyebaki yango? Alakaki yango, ndenge Akosala yango, pe ete na nzela na mwango na Ye ya ebandeli ya kopona Klisto, ya kopona bantango, ya kopona bileko, ndenge a . . . Akoki te kozanga kosala yango, mpo na Mwasi na Ye ya libala, mpo ete Mwasi azali eteni ya Liloba yango.

Akoki kopona Mwasi na nzela na ebongiseli te, mpo ete Aponaki Klisto na nzela na ebongiseli te. Boye Klisto ayaki kati na ebongiseli? Boye Ayaki na nzela na ebongiseli? Te. Bango baboyaki Ye. Ee, yango nde oyo bibongiseli basalaki na ntango wana. Bongo ntango Azali kopona Mwasi na libala, Akoki koya na lolenge mosusu?

Ndenge nini Amemaki Klisto awa? Na nzela na Liloba ya basakoli. Boye te? Ndenge nini Akomema Mwasi na Ye ya Libala awa? Na nzela na Liloba ya basakoli.

Ndenge nini Atalisaki Klisto ntango Ayaki? Na nzela na moto moko, oyo azalaki na molimo ya Eliya likolo na ye, oyo autaki na biliki. Ndenge nini Akotalisa Mwasi na Ye ya libala? Alakaki na Malaki 4 kaka likambo yango, liboso ete Abebisa mokili, lokola na mikolo ya Sodoma.

¹⁷² Bomikanisela, Sodoma ezikaki. Boye te? Ee, mokili oyo esengeli kozika. Yesu nde alobaki bongo. Pe ekozala ntango moko, oyo, ndenge Luka mokapo ya 17 na molongo ya 30 elobi: “Na mikolo oyo ekozala lokola Sodoma ná Gomora, na ntango wana nde Mwana na moto akomonisama.”

Na nsima eloko nini ekosalema? Kokokana na Malaki, Akozikisa lisusu mokili, pe bayengebeni (kati na Bokonzi ya mibu nkoto) bakonyata mputulu ya bato mabe. Boye te? Bomoni?

Boye tokómi mpenza na ntango na suka. Tozali sikawa awa na ekuke, tozali kozela ete Aya.

¹⁷³ Botala, Nzambe alakaki kati na Liloba na Ye ete Akopona Mwasi na Ye ya libala na lolenge na Ye ya ebandeli. Aponaki oyo ya Ye. Mobali na libala! Asakolaki yango na nzela na basakoli, pe Atindaki mosakoli moko mpo na kotalisa yango.

Mosakoli yango, ntango atelemaki na libongo ya Yolodani, alobaki: “Tala!”

Balobaki: “Ozali Masiya, boye te?”

Alobaki: “Te, nazali Masiya te.”

“Osengeli kozala Masiya.”

¹⁷⁴ “Kasi ngai nazali Ye te. Kasi Ye azali kati na bino. Pe sapato na Ye, ngai nabongi kofungola nsinga na yango te. Ntango Akoya, Akomitalisa polele. . .”

Pe lelo oyo Azali kati na biso, na bomoto ya Molimo Mosantu, Azali komimona moke moke koleka, koya kati na Lingomba na Ye, komitalisa polele; mpamba te, Ye, Mwasi na libala ná Mobali na libala bakokóma ndenge moko, Azali komitalisa polele. Pe mokolo moko okomona ete Ye oyo ozalaki koyoka kati na motema na yo, pe oyo ozalaki komona kotalisama na Ye, Akokóma moto liboso na yo, na ntango wana yo na Ye bokokóma Moko.

Bosangani na nzela na Liloba. Pe Liloba, oyo ezali Nzambe, oyo ezalaki na ebandeli, ekozonga na ebandeli. “Na mokolo yango, bino bokoyeba ete Ngai nazali kati na Tata, Tata kati na Ngai; Ngai kati na bino, pe bino kati na Ngai.” Aleluya! Tokómi wana. Aleluya! Nazali na esengo monene ya komona Ye moko komikómisa Moto kati na biso, pe ya komona makambo oyo Alakaki mpo na Liloba; ezali koningana, koyemba, kopimbwa, to kobina ya moto moko boye te. Kasi na nzela na Liloba na Ye, amen, Azali komitalisa Ye moko.

¹⁷⁵ Botala, ntango bamemaki, ntango batongáki tempelo pe bakotisaki sanduku na kati, Nzambe akotaki kuna na Likonzi na Móto. Amen. Dawidi moto azalaki kopimbwa pe koganga, bayembi ná banganzambe nyonso bato bazalaki kati na loyenge, nzoka nde bazalaki libanda na mokano na Nzambe. Kasi ntango Nzambe alakisaki esika pe etémelo na Ye mpo na sanduku, liboso kutu ete bakotisa sanduku yango kuna, tala Likonzi na Móto eyaki pe ezalaki kotalisa nzela; na likolo

mpenza ya mapapu na bakeluba, pe na kati mpenza ya esika eleki bulee, esika na Ye ya kopema; Likonzi na Mótó! Pe nkembo na Nzambe ezalaki na kati, na lolenge ete bat- . . . bamonaki ata ndenge ya kosala mosala te. Amen.

Ekozipa miso na bato ya likindo nyonso, ntango Akoya kokamata Mwasi na Ye ya libala. Akonétolama na—na katikáti ya butu, ndenge ezalaki, mpo na bango. Bakomona ata ndenge Akokende te. Oh, Nzambe akumisama!

¹⁷⁶ Botala, Nzambe alakaki ete Akobimisa Mwasi na Ye ya libala, pe makambo oyo Akosala. Momboto moko ekozala. Pole moko ekozala na ntango na mpokwa, ndenge Akosala makambo nyonso oyo, ndenge moko mpenza, pe na lolenge oyo Abongísáká yango uta na ebandeli kati na Kondimana na Kala pe na Kondimana na Sika.

Pe ezali na nzela ya bibongiseli te. Ezali na nzela ya mimesano na biso oyo tozali kosalela lelo oyo te. Tozali bobele koyeisa kufa. Botika bato basimba Yango, pe bakufa mpo na yango. Bomoni?

¹⁷⁷ Liloba, Nsango ya mpokwa, esengeli kobota mbano ya mpokwa. Nsango ya mpokwa esengeli kolona Momboto ya mpokwa, momboto ya ntango te. Momboto ya mpokwa! Boye te? Likambo ya midí, mimboto na yango kuna, ezalaki ya bibongiseli; ekufaki, ebebaki. Kasi Nsango ya ntango na mpokwa ekomonisa Pole ya ntango na mpokwa, ekomonisa mbano ya ntango na mpokwa; Nsango ya ntango na mpokwa!

Ntango na Yesu, nsango ya midí, emonisaki mbano ya midí. Nsango ya ebandeli emonisaki mbano ya ebandeli, ebotaki bokeli. Asalaki Mwana na Ye na elilingi na Ye Moko, na midí. Na ntango na mpokwa Asaleli Ye Mwasi na libala. Bomoni? Na nzela na nini? Na nzela na Liloba na Ye.

Ndenge nini Asalaki mokili? Ndenge nini Akelaki yango? Na nzela na Liloba na Ye!

Mwana na Ye azalaki nani? Liloba! “Na ebandeli Liloba azalaki, pe Liloba azalaki mboka na Nzambe. Pe Liloba akómaki mosuni pe afandaki kati na biso.”

Ndenge nini Akokamata Mwasi na Ye ya libala? Na nzela na Liloba; na nzela na likalo ya sika te, na nzela na likanisi ya moto moko boye ya likindo te. Kasi yengebene na Liloba na Ye nde Akotalisa Mwasi na Ye. Bobakisa ata eloko moko likolo na Yango te to bolongola ata eloko moko te uta na Yango sikawa. Botika Yango ndenge Ezali. Bomoni?

¹⁷⁸ Na ntango na mpokwa, Alakaki ete Akomonisa, kútu, Akofungola Bilembo Nsambo yango pe Akolakisa makambo oyo mangomba wana ya kala ezungaki. Emoniseli 10, Malaki 4, Luka 17:30, Alobaki ete Akosala yango. Sikawa tosangisa yango te. Totika yango kaka bongo.

¹⁷⁹ Botika ngai, mpo na kosukisa...Etikali soko, miníti penepene zomi na mitano liboso ete midí ekoka. Botika ngai nasukisa, na maloba oyo.

Baniga, boyoka, na Nkombo na Nkolo Yesu! Makambo oyo ezali mpenza polele mpo na bino na lolenge ete bokoki kozanga kondima Yango te. Ezali mpenza polele mpo na bino na lolenge ete bokoki kozanga komona Yango te. Na ntembe te bozali komona Yango! Na ntembe te mokili ekokaki komona yango! Kasi bobele oyo ya bino . . .

Bolanda makanisi ya mpamba-mpamba ná makambo oyo bazali na yango lelo oyo te; ata soki bazali bato malamumu ndenge nini, bazali sembo ndenge nini, etali ngai te. “Soki balobi yengebene na mobeko pe na basakoli te,” Biblia elobi, “Bomoi ezali kati na bango te.” Bomoni?

¹⁸⁰ Dawidi akanisaki ete azalaki na elonga. Azalaki sembo. Banganzambe wana bakanisaki ete bazalaki na elonga. Bazalaki sembo. Kasi bazangaki kaka koluka toli epai na Yawe mpo na likambo yango. Pe bakokaki kosala yango ndenge nini? Mbala mosusu balobaki: “Tobondeli mingi.” Kasi oyo wana ezalaki lolenge ya Nzambe mpo na kosala yango te. Alakaki ete Akosala eloko moko te soki naino Amonisi yango liboso epai na baombo na Ye basakoli te. Pe Natana-ele azalaki wana kati na bango mpenza, kasi balukaki ata toli epai na ye te.

¹⁸¹ Sikawa botanga mwa mikapo oyo elandi ya buku na Ntango, pe bokomona. Ntango Dawidi afandaki na ndako, alobaki: “Ezali malamumu,” pe Natana-ele afandaki elongo na ye, “ete ngai nazala, nafanda na ndako ya sedre, bongo—bongo sanduku na Nzambe ézala kuna na nse na hema?” Pe Natana-ele azuaki, epai na Yawe, oyo asengelaki koyebisa ye ete asala.

¹⁸² Pe asilaki kosala mbeba, na bongo Nzambe alobaki: “Yebisa moómbo na Ngai Dawidi ete Nalingi ye. Napesi ye nkombo lokola nkombo ya bato minene oyo bazali kati na mokili, kasi Nakoki kotika te ete asala yango,” bomoni, “asili kozanga botosi epai na Ngai. Omoni, Nakoki kotika te ete asala yango. Nakotelemisa mobali moko, mwana na ye, ye nde akotongela Nzambe ndako ya ntango nyonso.” Pe ezalaki nde Dawidi, ya solo. Elingi koloba, Salomona azalaki elilingi na yango, kasi na nsima akweaki. Mobali nyonso asengeli kokwea. Moto nyonso asengeli kokwea.

Bobele Nzambe nde akoki kokwea te. Ye akoki kokwea te. Yango nde eloko bobele moko oyo Nzambe akoki kosala te, kokwea. Pe Nzambe azali Liloba. Pe Liloba, ata soki emonani lokola ete elingi kokokisama ndenge mosusu, ekokokisama mpenza kaka ndenge Liloba elobi.

¹⁸³ Sikawa bomikanisela, bosengeli kolanda eleko, ntango. Bomoni? Eleko nini bozali kati na yango, ntango nini, pe étatolama, mpo na komona ete ezali mpenza Solo.

184 Sikawa kamata mitindo nyonso oyo, Liloba mobimba, bililingi nyonso, ná biloko mosusu, pe tala esika ozali. Kanisa ntango oyo tozali kobika kati na yango.

Botala kuna, epai wapi penepene moko na zomi ya mabelé ekómi pene na kozinda. Zebi nde elobi yango. Bazali kotala saa. Eleki mwa mibu, balobaki: “Etikali bobele miniti misato liboso na minwí.” Mbala mosusu etikali miníti moko, mbala mosusu ndambo ya miníti sikawa.

Balobaki: “Ekosalema na ekeke na biso te.”

185 “Ekoki kosalema na miníti mitano.” Pe botala likambo mosusu oyo alobaki: “Mibu mitano.” Sikawa, ngai moto nalobaki yango te. Ye moto alobaki yango, moto na zebi wana. Bazali kobima ebele na Californie lokola banzinzi. Bomoni? Ee, Mokolo oyo Lota abimaki na Sodoma, kaka mokolo yango, móto enókaki lokola mbula likolo na mabelé.

Moko na mikolo oyo Nzambe akokamata Nsango na biso, pe tokotika esika oyo. Likambo moko ekosalema, na ntembe te, na ntango wana, ntango Lingomba ekosila kokende, Nzoto na Ye, Mwasi na Ye ya libala.

186 Sikawa nalingi kotangela bino Likomi moko, pe nalingi ete botanga Yango elongo na ngai. Nalingi ete bofungola na Dutelonome 4, mpo na kosukisa. Namoni mbala mosusu ete oyo elobami ekoki, mpo bokoka kososola. Dutelonome 4. Nakotanga bisika mibale awa.

Mpo na losambo oyo, pe mpo balandi na ba-bande, baoyo bakoyoka ba-bande, pe baoyo basangani na biso na nzela ya nsinga na bisika ndenge na ndenge kati na ekólo, nalingi ete boyoka yango na bokebi mpenza, pe bozanga yango te. Yango nde likambo oyo na . . .

Dutelonome, mokapo ya 4. Nakozua molongo ya 1. Nalingi kotanga molongo ya 1, na nsima nakotanga molongo ya 25 ná oyo ya 26. Bokoki kotanga yango mobimba ntango bokokóma na bandako; kasi kaka, mpo na kowela ngonga, mpo tokoka kobima na ntango malamú, mpo ete nasengeli kozonga lisusu awa na mpokwa, soki Nkolo alingi. Boyoka maloba ya mosakoli oyo. Autaki kozala liboso na Elongi na Nzambe. Ayebaki eloko azalaki koloba. Boyoka.

E Yisalaele, sikawa yoka mibeko pe malako oyo ekolakisa ngai bino, pe sala yango, ete bobika pe ete bokoka kokota pe kokamata mokili oyo YAWÉ, Nzambe na batata na bino, apesi bino. (Yango ezali kotalisa Bokonzi na biso ya mibu nkoto.)

Bokobakisa eloko te likolo na mobeko oyo napesi bino, pe bokolongola eloko na yango te, (“Bobakisa ata eloko moko te na Yango, pe bolongola ata eloko moko te na Yango. Bokangama, boloba bobele oyo Yango elobi!”)

ete botosa malako na Yawe Nzambe na bino, oyo napesi bino.

Miso na bino mamonaki yango esalaki Yawe na Balapeolo, mpo ete Yawe Nzambe na bino abomaki na kati na bino bato nyonso babilaki Bala na Peolo. ("Sikawa bozali libota oyo etiami pembeni, longwa na bibongiseli wana." Bomoni? Bomoni?)

Kasi bino bokanganaki na Yawe Nzambe na bino botikali na bomoi lelo oyo. ("Bokufaki elongo na bibongiseli na bino te. Bozali na bomoi sikawa, pe bozali liboso na Elongi na Nzambe.")

Boyoka na bokebi, bozanga yango te. Molongo ya 25, sikawa, ntango bazali kokota kati na mboka, sikawa botala malamumu likambo oyo esalemaki.

Pe wana ekobota yo bana pe bana na bana, pe bo . . . esili bino konuna kati na mokili, soko bokosala mobulu (yango nde oyo esalemaki), na kosala bikeko (to eloko mosusu), na elilingi na eloko soko nini, pe na kosala mabe na miso na Yawe Nzambe na bino boye asilika, (Boyoka!)

Ngai nabiangi likolo pe mokili kotatola mpo na bino lelo, bomoni, ete noki bokokufa nye na mokili, to na esika yango, epai oyo bokokata ngámbo mpo na kokamata yango. Bokoumela molai na yango te, kasi bokokufa nye.

¹⁸⁷ Oyo ezalaki nde Mose koloba na Yisalaele, nsima na ye kotatolama na Nzambe, na nzela na Likonzi na Mótó, pe koyeba ete atalisamaki polele ete azalaki moómbo na Nzambe mpo na kokamba pe kobimisa bango. Pe liboso ete bakota na mboka yango, liboso ete bakota, Mose alobaki: "Sikawa, maloba oyo nauti koyebisa bino, nabengi likolo pe mokili kotatola mpo na bino. Soki bobakisi eloko ata moko mpamba na yango, to bolongoli Liloba moko mpamba na Yango, bokoumela te na mokili oyo Yawe Nzambe apesi bino."

Ngai pe nalobi bongo, na Nkombo na Yesu Klisto! Bomeka kobakisa eloko ata moko te. Bolongola te, botia pe makanisi na bino moko na kati na Yango te. Boloba bobele oyo elobami na ba-bande oyo. Bosala mpenza oyo Nkolo Nzambe atindi bino ete bosala. Bobakisa na Yango te.

¹⁸⁸ Asalaka bongo ntango nyonso, Abatelaka bilaka na Ye mpo na biso. Bilaka nyonso oyo Apesaki, Abateli yango. Asilá koyebisa bino makambo oyo ekosalema, pe esalemaki? Namemi likolo pe mokili liboso na bino lelo oyo, lokola móndengé. Nzambe asilá koloba likambo moko oyo Azangá kokokisa pe kosala mpenza oyo Alobaki ete Akosala mpo na biso? Asali yango te mpenza ndenge Alobaki ete Akosala yango? Ya solo. Akokoba kosala bongo. Bobele ete bobakisa na Yango te. Bolongola pe na

Yango te. Bondima Yango pe botambola bobele na komikitisa liboso na Nkolo Nzambe na bino, mpamba te tozali kobeleva na ntango ya kokota na Mboka.

Na ntango wana, bokozonga te, bokozonga lisusu na bomoi ya lolenge oyo te. Bokozonga lokola bato oyo bakoki kokufa te. Bokozonga, ntango lisumu ekosila kolongolama, ntango Satana akosila kokangama, pe kati na mibu nkoto, bokobika kati na mokili oyo, oyo Nkolo Nzambe na bino apesi bino. “Basokemi bakosangola mokili.” “Esenko na bango bakotosa mibeko na Ye, ete bazua makoki ya kokota na Mboka.” “Na libanda bato na soloka bazali, na bakosi, na bato na pité, na bambwa. Bango bakokota kuna te.” Ezali bobele mpo na Basikolami, pe mpo na baoyo bazali kotambola kati na mibeko na Ye.

¹⁸⁹ Bondima makambo ya sika te. Ezali kotambola bipai na bipai, pe ekoya lisusu mingi koleka. Kasi bondima makambo wana ya sika te.

Nkolo Nzambe na bino asili koyebisa bino polele oyo Solo ezali. Nkolo Nzambe na bino asili kotatola oyo Solo ezali, na nzela na Liloba na Ye pe na nzela na Molimo na Ye. “Na nzela na makasi te, na nzela na nguya pe te, nde na Molimo na Ngai.” Pe, Molimo, “Nzambe azali koluka baoyo bazali kosambela Ye na Molimo pe na Solo.” “Liloba na Yo nde Solo.” Pe Atatoli na mobimba mpenza ete Yesu Klisto azali ndenge moko lobi, lelo, pe libela. Atalisi bino Mimboto ya mpokwa. Amonisi bino Yango, kati na Liloba. Atalisi bino Yango polele, na nzela na Molimo na Ye.

¹⁹⁰ Bobanda to bomeka kobanda ebongiseli moko boye soko moke te. Bomeka kotonga likolo na eloko mosusu te.

Kasi botikala na komikitisa liboso na Nkolo Nzambe na bino, mpamba te ezali komonana lokola ete etikali moke ete bikuke ya Mboka na elaka ekoka kofungwama. Na bongo tokota na banzembo pe na esengo ya solosolo, ntango Mwasi na libala ná Mobali na libala bakofanda na Ngwende.

¹⁹¹ Bobika na komikitisa. Bobika na bolingo. Bolingana bino na bino. Bozala na makambo kati na bino te. Soki omoni eloko moko koya kati na motema na yo kotelemela moto, bimisa yango mbala moko. Kotika te . . .

Satana akosala na makasi na ye nyonso ete akota kati na bino. Bomoni? Bomeka kotika te ete yango esalema. Mobali moko oyo ayebi koloba akoki koya komeka komema bino mosika na Yango. Bokanisi ete bakokaki kondimisa Mose ete azalaki Liboso na Nzambe te, na ntango oyo autaki mpenza kozala wana pe komona Yango? Te, misie. Te. Tokolongola na Yango to kobakisa na Yango te. Totika Yango kaka ndenge Nkolo alobi yango. Tolingi ata lingomba moko oyo ebongisami te. Tolingi ata ebongiseli moko te. Tolingi ata mabe moko te. Tolingi ata kowelana moko te. Tolingi nde Nzambe, pe Ye azali Liloba.

Sikawa togumba motó.

¹⁹² E Nzambe, nazali kotala bipai na bipai na miso ya molimo, nazali komeka komona makambo oyo ezali kosalema. Nazali komona Liloba na Yo, ndenge Etatolami, ndenge Etalisami polele; kati na mibu ntuku misato na misato oyo euti koleka, awa na ebale, makambo oyo Olobaki. Pe yango oyo, nsima na mibu ntuku misato na misato, pe Ozali kosala mpenza makambo oyo Olobaki. Pe Okokisi mpenza makambo oyo Olobaki. Nkolo, mosika na biso likanisi ya kokómisa Yango moke koleka to ya kokómisa Yango monene koleka; totika yango ézala kaka ndenge Opesi Yango, tótámbola bobele na komikitisa pe tólanda Yo.

¹⁹³ Baoyo, Nkolo, bazali nde bato oyo Oboti na mosala oyo, libanda na baoyo nyonso balali na ekólo mobimba, na mokili mobimba. Bankunda oyo ebómbí bato mingi, kati na baoyo bazali kozela, basantu oyo bapambolami. Kasi ezali ndenge elobamaki: “Biso bato na bomoi, baoyo totikali, tokoleka liboso na balali te. Kelelo ekoyula, bakufi bakosekwa liboso; na nsima tokonetwa esika moko na bango.” Ntango nkembo na Nzambe ekozala likolo na mokili, ekobomba Lingomba mosika na miso na mokili. Mokili ekomona ata Yango te, ntango Ekokende.

¹⁹⁴ Tata Nzambe, batela bango kati na maboko na Yo. Bazali ya Yo. Nabondeli, e Nzambe, ete totambola ntango nyonso na komikitisa liboso na Yo. Toyebi te soki etikali ntango boni. Tozali na mposa ya koyeba ntango boni etikali te; etali biso te. Etali nde Yo. Mokano na biso ezali te ete toyeba soki Okoya ntango nini. Mokano na biso, Nkolo, ezali ete totikala kati na komikitisa kino na ntango mpenza Okoya, pe ete totambola elongo na Yo. Mposa na biso ezali ete Omitika mpo Omonisama, mbala moko ntango na ntango, Tata, kati na biso, mpo tomonaka ete tozali ntango nyonso kotambola elongo na Yo.

¹⁹⁵ Limbisa biso masumu na biso ya kala. Tambwisa biso pe batela biso na mitambo nyonso ya zabolo, na mikolo ezali koya. Kamba biso pe tambwisa biso, E Nzambe Tata na biso. Limbisa masumu na biso pe sunga biso ete tozala bana na Yo. Tozali kati na molongo ya babola. Toboyami, na bitonga ya bato na mokili oyo, na bibongiseli ya mangomba.

Tozali komona suka. Pe totondi Yo mpo na miso ya molimo kati na Liloba na Yo, mpo na komona ntango na suka, mpamba te makambo nyonso oyo esengeli kokóma kino na kobomama monene na mabanga oyo ekouta na Likolo. Sunga biso, Nkolo, ete tozala awa te na ntango yango, kasi ete tósíla kokende kino na Elongi na Yo, tópimbwa mpo na kokende kino epai na Yo.

¹⁹⁶ Bikisa babeli pe bato na mawa, Nkolo. Tobondeli ete na mpokwa Opesa biso liyangani ya motuya mpenza, tika ete moto na botaú moko te ázala kati na biso, mpo na Bozali na Yo, Nkolo. Tika ete mitema na biso ékangama ntango nyonso na Yo. Pe toyebi, Nkolo, ete mbongo, bozui, biloko ya mokili ezali

na ntina te, ezali kaka mpo na mwa ntango. Nyonso esengeli koleka. Misala na biso, bisika na biso, baninga na biso, nyonso esengeli koleka. Ata soki tozali bazui ndenge nini, babola, bato oyo balingami to balingami te, nyonso wana esengeli koleka. Kasi eloko ezali bobele moko oyo bozali na biso awa ezuami zingazinga na yango, ezali nde Yesu Klisto. Boye, e Nzambe, totia biloko nyonso oyo etikali na nsima, pe tokangama na Ye. Pe Ye azali Liloba. Kokisa yango, Nkolo.

¹⁹⁷ Liloba litatolami ya ntango oyo! Liloba litatolami ya ntango na Mose ezalaki nde Yesu. Liloba litatolami ya ntango na Yisaya, Eliya, Yoane, bango nyonso, ezalaki nde Yesu. Pe Liloba litatolami lelo oyo ezali nde Yesu, motindo moko lobi, lelo, pe libela. Sunga biso, Nkolo, ete tondima yango, tomona yango, pe totambola kati na yango. To—tosengi yango na Nkombo na Yesu.

¹⁹⁸ Wana togumbi mitó, nazali komituna soki bato mosusu bazali awa oyo naino bázuá te mpenza eloko ya solosolo, na mobimba mpenza. . . Bondimi Yango, kasi kondima Yango mpamba ekoki te.

Nandimi ete mwasi na ngai azalaki elenge mwasi malamumu. Nayebaki tata na ye, ná mama na ye. Nayebaki ye kati na mibu ebele. Azalaki kobika bomoi ya sembo. Nazalaki kondima ete azalaki mwasi malamumu, kasi yango esalaki te ete ázala ya ngai. Akómaki naino ya ngai te liboso ete, ye, ngai nándima ye, pe ye ándima ngai.

Sikawa Yesu alingi koyamba yo. Okolinga te koyamba Ye mpo ókóma eteni ya Liloba na Ye? Soki naino osálá yango te, wana bogumbi mitó pe bogumbi mitema, nabanzi. . .

¹⁹⁹ Esika ezali te mpo na kobenga bato awa na etumbelo. Nandimaka yango mpenza te, ata boni. Nandimi ete Nzambe akokutana na bino kaka bisika bozali. Bokolinga kotombola maboko, koloba: “Ndeko Branham, kanisa ngai na libondeli. Nalingi koyamba Ye.” Nzambe apambola yo. “Na. . .” Nzambe apambola yo. Oh! la la, maboko etombwami bipai nyonso! “Nalingi kozala bongo.” Nzambe apambola yo, ndeko. Apambola yo, ndeko; bino nyonso, awa. “Nalingi kozala bongo.” Nzambe apambola. . . “Nalingi mpenza kozala bongo. Na—namoni yango.”

Ee, sikawa, botala, baninga, mwa eloko moko boye ekoki kozala. . . Soki bozali bongo te, na ntango wana bozali zingazinga na eloko mosusu, libanda na yango. Bozali mpenza pene na yango, bozali kotala yango. Bozali komona yango. Bomonaki yango kokola kati na mibu ebele. Bozali komona yango kokomela sikawa. Soki yango ekoki mpo na biso, pe ete eloko mosusu ekoumela te kaka Yango, mpo na nini te kobalola elongi longwa na eloko oyo bozalaki kotala pe komipesa na mobimba epai na Ye? Kútu, eloko oyo ezali na motuya koleka

nyonso, ya nyonso nsima na liwa, ezali nde Ye. Bokolinga te kotombola maboko, wana tozali kobondela elongo?

²⁰⁰ Nzambe molingami, mibali, basi, bana mibali, bana basi, ata batei, batomboli maboko. Ba—balingaki ko—koloba ete balingi komipesa mobimba mpenza epai na Nkolo Yesu, nzoka nde emonani lokola ete bazali kokoka kosala yango te. Eloko moko ezali kobenda bango epai *oyo*, epai *kuna*. Ekoki kozala ebongiseli moko boye, ekoki kozala moto moko boye, ekoki kozala lisumu moko boye, ekoki kozala eloko moko, oyo babombi kati na motema. Ngai nayebi te, Nkolo. Yo nde oyebi. Ata soki ezali nini, tika ete kaka sikawa, Nkolo, wana ezali Yo kobenga bamosusu. . . Osili kobenga bango. Bazali ya Yo.

Pe wana Ozali kobenga bango, tika ete bakangolama na yango, na masumu oyo ekangi bango, ndenge Biblia elobi. “Tolongola masumu mazali kokanga biso na pete, mpo tokoka kopota na etingia na emekaneli na mbango etiami liboso na biso, awa ezali biso kotala. . .” Nini, mosala na biso, ebongiseli na biso, etonga na biso, likita na biso? “Klisto, Ye mobandisi pe mosukisi na kondima na biso epai na Ye.” Sala yango, Tata, mpo na biso lelo oyo, mpamba te tosengi yango na Nkombo na Ye pe mpo na nkembo na Ye.

²⁰¹ Sikawa bazali ya Yo, Nkolo. Sala na bango ndenge Olingi. Sala na biso ndenge Olingi. Tozali ya Yo. Na Nkombo na Yesu. Amen.

Nalingi Ye, nalingi Ye
Mpo Alingaki ngai liboso
Pe Asombi lobiko na ngai
Likolo na Ekulusu.

²⁰² Bobosani bilei na bino ya moi? Bobosani soki bana bazali malamumu, na kati ya motuka, to te? Bobosani makambo nyonso oyo eleká, pe bozali koyeba eloko nini oyo bozali koyoka sikawa? Ezali kokóma likambo ya solo liboso na bino, mokolo na mokolo. Bomoni? Botika ete yango ékóma eloko oyo eleki motuya na nyonso. Botika makambo mosusu éleka; ekobeba kaka, ata boni.

Oh, bokoba kaka kolanda Ye na nsima! Bomoni? Ndenge Elisa alandaki Eliya, biso tolanda Ye. Mpamba te biso pe tosengeli konetolama mokolo moko. Tomonaki likalo ya Mító oyo ebimisaki Ye na nkunda. Tozali koyoka Yango kati na biso sikawa. Mokolo moko Akofungola bapunda oyo ekangami na matiti. Tokomata. Bolingi Ye, boye te?

Pe Asombi lobiko na ngai
Likolo na Ekulusu.

Oh, okoki te kokanga miso kaka mwa moke pe komona Ye kuna na likolo?

Nalingi Ye, (nakokaki lisusu kolinga nani?)
 nalingi Ye
 Mpo Alingaki ngai liboso
 Pe Asombi lobiko na ngai
 Likolo na Ekulusu.

²⁰³ Mbala nyonso, ntango nazongaka awa, moto moko azali lisusu te. Soki nasali mobembo ya mwa basanza, nazongi, moto moko azali lisusu te. Nazalaka na mawa mbala nyonso nazongaka awa.

Mokolo wana, mobali moko oyo totángá na ye, azalaki kotambola na balabala, alobaki na ngai: “Mbote, Billy.”

²⁰⁴ Natalaki ye, azaláká elenge mobali kitoko, na suki moindo oyo ezaláká kongenga pe azaláká kozongisa yango na nsima; sikawa ekómí mpembe lokola matandala. Azaláká nzoto mike; libumu na ye ekómí monene *boye*. Nalobaki: “Mbote, Jim.” Natalaki ye.

Nayokaki kati na motema, namilobelaki: “E Nzambe, elenge mobali wana ná ngai, mobali wana ná ngai, mibu na biso ekokani.”

Na bongo, nayebi ete mikolo na ngai ekómí ya kotanga. Nayebi ete etikali lisusu ntango molai mingi te. Natalaka bipai na bipai, pe nakanisaka: “Nakoki kosala nini, Nkolo? Sunga ngai. Nalingi koleka liboso na Yo te. Nalingi kotikala mpenza—mpenza nsima na Yo. Yo nde Ókamba ngai.” Natalaka, pe namilobelaka: “Mibu ntuku mitano na motoba, oh! la la! etikali lisusu ntango molai te!”

²⁰⁵ Pe nakitisaka miso, namonaka moninga na ngai mpenza Bill Dauch oyo afandi kuna, azali na mibu ntuku nsambo na mibale to ntuku nsambo na misato. Natalaka bipai na bipai, namonaka bana oyo, bakanisaka: “Ee, nakozela kino nakokóma na mibu lokola ya Ndeko Branham, bongo nákanisa makambo wana.” Molingami, mbala mosusu okomona yango te. Nandimi mpenza te ete bokomona yango. Bomoni? Kasi, bokanisa naino, soki Ndeko Bill Dauch azali na bomoi lelo, nkama na nkama ya bilenge ya mibu zomi na mitano, zomi na motoba bazali kokufa liboso na ye. Bazali kokufa na ngonga nyonso.

Boye mibu oyo ozali na yango ebongoli nini! Ozali kosala nini na ngonga oyo ozali kobika kati na yango? Ozali kosala nini mpo na Yesu sikawa? Bomoni? Oh, nazali na mposa ya komona Ye. Nazali na mposa ya komona ntango oyo nakotala pe nakomona ete banzoto nyonso wana ya konuna ebongwani, nakomona ete “ebongwani na mwa ntango mokemoke, na ntango na kobweta liso.” Soki ezali bongo te, na bongo tozali suka na bilema; liya, mela, pe sepela, mpamba te lobi okokufa; omoni, ozali mpenza lokola nyama, okufi, okei na putulu pe esili. Kasi bomoi moko ezali kati na yo, oyo ekokufa . . . oyo ekokufa te, ndeko. Tosili koyoka maloba longwa na Likolo. Tosili komona

yango kotalisama polele. Toyebi ete Azali, pe ete Akozongisa libonza epai na bango bakolukaka Ye.

Sikawa, binama ya Nzoto na Klisto, wana tozali koyemba yango lisusu, nalingi ete bofanda kaka na bisika na bino pe bopesana mbote ya loboko wana tozali koyemba yango lisusu.

Na . . . (pesa ndeko na yo ya mobali pe ya mwasi
mbote) nalingi Ye
Mpo . . . (Richard!) . . . ngai liboso
Pe Asombi lobiko na ngai
Likolo na Ekulusu.

²⁰⁶ Bolingi Ye? Boloba: “Amen.” [Losambo balobi: “Amen.”—N.D.E.] Bolingi Liloba na Ye? Boloba: “Amen.” [“Amen!”] Bolingi makambo na Ye? Boloba: “Amen.” [“Amen!”] Bolingi Nzoto na Ye? Boloba: “Amen.” [“Amen!”] Na bongo, bolingana kati na bino. Amen! Ya solo. “Na bongo bato nyonso bakoyeba ete bozali bayekoli na Ngai, soko bolingani kati na bino.”

Sikawa natii maboko na ngai likolo na misuále oyo, soki bosengeli kozua yango liboso ete butú éyinda.

²⁰⁷ Nakosenga na Ndeko Richard Blair . . . oyo Nzambe ayanolaki libondeli na ye, ye ná ndeko oyo, ntango babondelaki mokolo wana, mpo na kozongisa mwana mobali oyo azali kati na biso lelo, oyo azali na bomoi, na ntina na kondima na bango epai na Nzambe. Pe sikawa nalingi ete árukisa liyangani na biso na libondeli, na mwa ntango moke, mpo tókoka kozonga lisusu awa na mpokwa.

Tokómi penepene midí na minítí mitano, kokokana na saa oyo kuna. Pe nalingi ete bozonga awa na mpokwa, soki bokokoka, soki bozali mosika te. Soki esengeli ete bozonga ndako, tika ete Nzambe abatela bino na nzela, asunga bino, pe abomba bino. Soki bokoki kotikalala, pe ete bolingi kotikalala, ekozala malamú ete botikalala. Nzambe azala na bino sikawa.

Kino ntango tokokutana! kino ntango
tokokutana!
Kino . . . (totombola maboko epai na Ye) . . .
tokokutana na makolo na Yesu;
Kino ntango tokokutana! kino ntango
tokokutana!
Nzambe azala na bino kino ntango tokokutana
lisusu.

[Ndeko Branham abandi koyemba *Nzambe azala na bino* kozanga kobimisa maloba—N.D.E.] babimaka na ndako ya Nzambe nde boye, na molimo ya mabondeli, na komikitisa, totii motema ete tokokutana lisusu na mpokwa. Soki tokutani te, “Nzambe azala na bino kino ntango tokokutana lisusu!”

Togumba motó sikawa. Ndeko Blair.



KOMEKA KOSALELA NZAMBE MOSALA
LIBANDA YA MOKANO NA NZAMBE LIN65-0718M
(Trying To Do God A Service Without Being The Will Of God)

Liteya oyo ya Ndeko William Marrion Branham, eteyamaki liboso na Ngelesa na mokolo ya lomingo na ntongo, mokolo mwa 18, sanza ya nsambo, na mobu 1965, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2012 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org